

MBITUKUMBANYINE BWÀ

KUKUMBABA BWAKANE BWÔNSÒ

 Bitu misangu yônsò ànu dyèsè dyà kulwa ku nzùbu wa Mukalenge. Kacya, mu mwoyi wànyì, ncitukù mwanji kumòna cikondo nànsha cìmwè cínkààdiku munyingàlale bwà dilwa dyà mu nzùbu Wendè to. Cidi... Kàdi ndi ncinka nè mu dindà emu ke cikondo cìvwà citàmbe cinkolela bwà kulwa kacya. Èyowà, ncyà bushùwà. Pa nàнку, bintu bìdi byènzeka mu nsòmbelu, tudi bamanyè nàнку, bitùdi nè cyà kukùngamangana naabì. Nènku tudi nè cyà kuvùluka aci, nè bìdi bìfikila bantu bònsò.

² Nènku tudi nè kusàkidila kwàbùngì mu dindà emu, mèmè ndi naakù, nè ndi mumanyè nè bânà bèètù bàà balùme nè mwanèètù wa bakàji bàdi nè kusàkidila kwàbùngì kùdi Nzambì, bwà kumanya nè wetù maamù mmusùngidiibwe.

³ Nè yêyè ùkaadi mununu, nè tukààvwa bindile cyôci eci kùkaadi cikondo kampàndà, bwalu yêyè mmamwëndè wa bânà bààbùngì, nè mubidi wèndè mmutekète. Mu matùkù à maamù wanyì, kabàvwa nè bintu bìdìbo naabì mpindyewu ebi to, bwà kucyùka baamaamù pàvwàbo bàlela. Pàmwàpa, pàngàpa, maman ùvwa mwà kulela umwe wa ku bânà mu dindà adi, nè kujuuka kudìtwa mu disukula dyà bilàmbà mu mapingaja amu. Kàdi bwà mpindyewu bàdi bàshààla mu lùpitaadi matùkù mulongolongo, nè manga à mìshindù yònsò, àdiku. Tudi nè kusàkidila bwà bintu byà mùshindù awu bìdi mwà kwambulwisha baamaamù aba, nè bònsò.

⁴ Ùkaadi pabwìpì menemene, menemene nè lufù mpindyewu. Nènku ndi... [Mwanèètù Branham ùdi ùdila—Muf.] Bìdi ànu—ànu bikolè ndambù mu dindà emu, kàdi nànsha nàнку mvwa—mvwa mulayè bwà kwikala kaaba aka. Nènku ndi...

⁵ Mpindyewu, ncyèna mwà kwamba nè mààmù wanyì ùdi munkaci mwà kuya to. Ntu misangu yàbùngì ànu mwàmbè cyôci eci. Nè bààbùngì mbantèmù, pa bìdi bitàngilà bikèènà-kumòna. Mèmè nè: “Bu mààmù wanyì sungasunga mwikàle mulààle, ùpunga nè lufù, nè muntàngile mu mpàla wàmba nè: ‘Billy, ncinyì—ncinyì cidi mwà kundwila?’” Mèmè nè: “Ànu Nzambì mwà kungambila, ncyèna mufwànyine kumanya to. Ncivwa—ncivwa mwà kumanya to.” Kàdi cintu mene aci ki cyàlu kwenzeka’s. Pìikalàbi nè maamù ùdi munkaci mwà kuya, Yèyè mmucilamè bulelèlè bu munsokòntò kùndi.

Kumpàlà kwà tààtù wanyì kufwàye, ngàkamòna cikèènà-kumòna cyà yèyè mwikàle ùya.

⁶ Pāncīcivwà ngènzàmpèkààtù, ngákamòna mwanèètù wa balùme, wákaya kumpàlà awu, munkaci mwà kuya.

⁷ Howard. Mwya munùlondèle nwènu bònsò, bidimu bibidi anyi bisàtù kumpàlà kwà kuyayè, bwà diya dyèndè.

⁸ Kàdi, bwà maamù, Yèyè kí mmungambileku dīyī nànsha òmwè to. Nènkù pīkalàye munkaci mwà kuya, ncintu cīndi ncīyī mumanyè to. Nànsha mùvwàbi nè, tuvwa nè... Ngàngàbukà mmwambè nè yèyè kàvwa mumòne mùvwàye mushààle nè mwoyi too nè mu dyàlumingu dishààle dijimà adi to. Ne ùdi mu ngiikadilu mubi wa menemene. Kàdi, nànsha nànkù, pāmvwà... .

⁹ Kùkaadi bu ngondo mujimà nànkù awu, ànu bu mūmvwà mwenzèle Màdamù Broy amu; ntu misangu yònsò muswè kuenketa bantu, mumanya nè bàkaadi pabwīpi nè ndekeelu, ànu bwà kumòna mùdibo biimàne menemene. Tudi nè cyà kwikala batwīshībwe bwà cyòci eci. Katwèna ànu baswè kwamba nè: “Èè, pāmwapà mbīmpè to.” Tudi baswè kwikala batwīshībwe nè ncyà bushùwà.

¹⁰ Mwya mwènzè muiyiki mule mwīmpè dīndà kampàndà nè maamù. Kwambayè nè: “Billy, ndi—ndi mushààle nè mwoyi ntàntà bule būmvwà nè cyà kwikala nè mwoyi.” Yèyè nè: “Ncyèna nè cikwàbò cintu nànsha cīmwe cyà kwikadila nè mwoyi to.” Yèyè nè: “Ndi nè cyà kuya.” Ke yèyè nè: “Mbipīcībwe nè mèmè muiyè, mukīikàle nè papa nè bāmwe bàà ku bàna bakwàbò bàdi Kuntu kwàka abu. Ntu mfika ku dīnùmòna nwènu aba, pa ciibidilu.”

¹¹ Kàdi pàvwàbò munkaci mwà kumutèèka mu màshinyi à cyambula-babèèdi, bwà kupàtuka kuya nendè ku lùpitaadi, bwà kufila nsùkaadi, bwalu kàvwa mwà kudyà kantu nànsha kāmwe to. Bàvwa nè cyà kumupèèshila nsùkaadi mu mijilu yèndè. Ke mèmè kumwambila, patùvwà tumutèèka mu màshinyi à cyambula-babèèdi apu, mèmè nè: “Mpīndyewu, maman, byònsò’s mbīmpè.”

Yèyè nè: “Ndi njinga kuya.”

¹² Ke mèmè kwamba nè: “Maman, bu wèwè mwà kunshīila bubanji pa buloba, bwà ndola mìlīyò lukàmà, bwètù twètù bàna, anyi uvwa utùshila nzùbu wa ùmukila ku cimenga too nè ku cikwàbò, kí mbifwànyīnekù kwikala cintu cyà kupàlakaja nè bujaadiki bùdi utùshīila ebu bwà nè: ‘Ndi mudīlongòlòle bwà kuya’ to.” Mbubanji bùdi mfrànga kayīyī mwà kusumbà to, bwà kumanya cyòci aci.

¹³ Nànkù ki bwa cinyi, kumpàlà kwà cyòci aci, ndi mwimàne nè bukitù bwònsò, ngiitabuuja bintu bìndi muiyīshè ebi. Eci ncilelèla bwà maamù wanyī, ncilelèla bwà mamwèndè wa muntu mukwàbò, ncilelèla bwètù bònsò. Ncyèna mwà kwamba nè: “Nzambì, kumwangàci to.” Bwalu, ndi mumanyè nè pàdi ànu musùkà wèndè wà cīfwàkà awu wùmuka mu mubidi ewu, ùdi

nè mukwàbò mwindile. Nè yèyè neikalè cyàkàbìdì nsongàakàjì wa citende, mu tusunsa tukesè cyanààná paanyimà pàà yèyè mumanè kuumuka kaaba aka.

¹⁴ Nukààdikù bamòne mwànà mukesè wa mu dibòko pàdiye ùlediibwa anyì, tusunya twèndè tukesè atu tüzakalala nè tùdinyònda anyì? Kàdi pàdiye ùfika pa buloba, ùdi ùpeta nyumà kampàndà, nè pashìishe ùdi ùlwa musùùkà wùdì nè mwoyi. Nènku pàdi ànu musùùkà wàlukila ùpàtuka mu kaamubidi kakesè aku, kùdi mukwàbò muwindile. Nwamònu anyì? Bwalu, dyàmbedi, Nzambì ùdi wènza musùùkà nè nyumà, bìdi ànu bìya kùdì mibidi. Nènku, nè patùdì tuumukà pànwàpa, tudì ànu tushintulula myabà yà disòmbela nè tuya ku mukwàbò. “Bwalu piikalà ntentà wa pa buloba ewu mwà kunyanguka, tukààdi nè mukwàbò mwindile.” Pa nàнку, ke busàmbì bwètù mbwòbù abu.

Mpindyewu túsambilàayaaku.

¹⁵ Taatù wetù wa mu Dyulu wa Butùmbi, ncinyì citùdì mwà kwenza mu mèbà à dikèngela dyà bwalu bukolè aa, bu kabùyì Wèwè Wèwè? Kàdi ditèkemena dyètù kì ndiibakila pa cingà cintu to ànu pa Mashì nè bwakàne bwà Yesù! Nènku tudì nè disànkà dyàbùngì dyà kumanya nè kùdi Buloba dyàmwàmwa dyà musùlù. Bwà nè pa Ùdì ujikija neetù pa buloba ebu, tudì ànu tushintulula myaba yètù yà disòmbela, ku Buloba bwà butùmbi abu, dyàmwàmwa, mùdi kamùyì ní mbubèèdì anyì disaamà dyà mwoyi, lufù anyì ditàpuluka. Netwikalè Neebè misangu yònsò nè bananga bèètù. Pa nàнку, tudì tuKusàkidila bwà ditèkemena dyà butùmbi didì munda mwètù leelù ewu edi.

¹⁶ Nènku bìvwà bimwèke, Mukalenge, bikolè mu dindà emu bwà mèmè kupweka; kabiyyì bwà kuKukwàcila mudimu to, kàdi bwà kumanya nè ndi mubindùlùke nè ndikonka ànu mungikale mwà kulenga Mukenji ewu mu dindà emu bwà èkèleeziyà, ùndì ndyùmvwa nè Wèwè udi mutèèke pa mwoyi wànyì. Mùshindù wùdì mulwishì munyùngùlùje eku nè eku naawù's! Kàdi ndi mulwè too nè apa, ku cyambilu, mu Dinà Dyèbè. Nènku ndi ndilambula mèmè mwine, nè Mukenji nè byònsò, mu byanza Byèbè, nè mumanyè nè Wèwè udi mutàmbe nè bukolè bwà kuWùtwàdila mwoyi wònsò, nè bwà mufila byònsò bitùdì naabi dijinga. Tudì tubilambula byònsò Kùdì mpindyewu, nè twètù biinè, bu mudimu Wèbè; bu mùdì mishikù yànyì mukana Mwèbè, nè macì bu dikunji Dyèbè dyà ditèelejila. Tùbènèshèku, Mukalenge.

¹⁷ Nè swàkù bwà bakwàbò baamaamù, baataatù, nè aba biikalà mwà kwikala mu matùkù àcilwalwà abu, piikalà buloba mwà kutùungunuka, swàkù bwà bàdìlongòlòle nè bàmanyè, pààbò, nè bàdi nè cyà kupweka dīngà ditùkù pa dībà didì maamù mufikè edi. Ndi ndòmba, Nzambì, bwà bòbò kudìlongolola leelù ewu. Bwalu kakwena cikwàbò cintu nànsha cimwè pa buloba cidi nè mushinga to. Kakwèna mfrangà nànsha yà kànà yidi

mwà kusumba to, kakwèna dimanyika nànsha dimwè didi mwà kukwàcisha to; cintu nànsha cimwè kacýèna mwà kukwàcisha to ànu Nzambi, nè ànu Nzambi nkàâyendè. Nènku tudi bakwàte ku cyanza Cyèndè cidì kacýi cishintuluka, bamanyè nè Yèyè mmwàmbè nè: “Makàsà à baakàne mmalombola kùdì Mukalenge.” Pa nàнку dikèngà dikesè ditùdì naadi mpindyewu edi, mu nsòmbelu wa mpindyewu ewu, kadyàkumvwija cintu ciinè to. Ànu mwàcyàmbi mwedi wa kasàlà nè: “Ntátu mikolè yà mu njila kayàakumwènèka bu cintu to, patwàfikà ku ndekeelu wa njila.”

¹⁸ Tùkwàcishèku, Mukalenge, tùkoleshe batàngile ku cimanyishilu cyà dibìikila ditùmbùke; bamanyè nè dîngà ditùkù, mu dyàmwàmwa dinène edi, netùtwilanganè mu lutùulù ànu àbìdì àdì panshi aa. Bènesshàku Mèyi Èbè mpindyewu. Bènesshàku basadidi Bèèbè. Mwànà yònsò wa Nzambi udi kaaba aka awu, swàkù bwà myoyi yàbò yìkalè nè luuyà nè mivundùlùke mu dindà emu. Nènku, Taatù, ndi dijinga nè ndambù wa byòbì abi, mèmè mwinè. Ndi ndòmba bwà Ucyènzè, bintu byònsò ebi, mu Dîna dyà Mukalenge Yesù Kilistò. Amen.

¹⁹ Mpindyewu ngàmònu nè tudi nè ndambù wa mishwàlà mwab'ewu. Nènku ndi. . . Netùkafikèku ànu mu katanci kakesè emu.

²⁰ Nyèwù ncifùmina ku lwendu kùmvwà muyè mu lwendu lwà bulembi, nè muntu kampàndà lwà pabwìpì nè Alaska. Nudi bamanyè nè, muvù ewu wùdi bu muvù wùntù mutèèke ku luseke, muvù wà mabèji àpòòpoka wà cidimu, bwà mèmè kudìibakulula, ndilongolola bwà mivù yìdì yisanganyiiwbà kumpàlà eku bwà mudimu.

²¹ Ncyèna nè dikàndà dipite to, èè, mùndì mufwànyine kwamba, mu mijilu yànyì emu. Ndi nè—nè ndongolwelu wa mijilu mubì bikolè be. Nènku ndi mumanyè nè bìdì bikèngela ndongolwelu wa mùshindù awu bwà kwenza mudimu wà bwambi wùdi Mukalenge mumpèèshe awu. Kwèna mwà kwikala nè bintu byònsò byà butùmbi, pa buloba to. Bwà mu mubidi emu, ndi nè kusakidila kwàbùngi bwà mubidi wà dikàndà. Kàdi ndongolwelu wanyì wa mijilu, bwalu udi ùkwàta mudimu ànu mu mulongo pankacì pàà cyà mubidi nè citàmbe-mfùkilu, kàdi's cidi cikusùnsulula. Nènku kacya ncitukù mwànji kuteeta kusòmba panshi bwà kumvwija disangisha dyànyì aci to, bwalu kabàvwa mwà kuumvwa to, bwalu mèmè ncyèna ncyùmva to, mèmè mwinè. Kàdi nànsha mene bangàngàbukà, mbangènzè mateeta nè bangèlè diteeta dyà dicìncimika mijilu; kwambabò nè kacya kî mbànji kumònakù cintu nànsha cimwè bu nàнку to, nwamònu's, mùshindù wùdici mwà kuumuka ku mwaba kampàndà, kuya citàngile too nè ku mukwàbò. Mèmè ncyèna ngumvwa bukèbikebi bwàbò bwà maalu à mamanya abu nè, anyì cidìbo benzè aci to, mishindù yàbò yà dyenza maalu.

Kàdi ndi mumanyè nè kwàkangenzekela cintu kampàndà ditùkù kampàndà, pàakantwà Kilistò byanza, ngaakashintuluka.

22 Nènku ndi muswè ànu kwamba nùnkù ewu, ncifwànyine kunkànkamika. Mbimwèke ànu bu nè ncifwànyine kwikala cintu cyà pabwàcì menemene, bwà kwakulapù, mu dindà emu. Kàdi ànu, kumpàlà kwà kubwela mu Diyiisha dyànyì, bwà kudìtùùjakù mèmè mwinè, ndi muswè kwamba nànkù. Pàmvwà mumanyishe bwà kwikala mwab'ewu, ncìvwa mumanyè nè maamù neikalè mwà kusaama to.

23 Nènku mvwa kàbidì mumanyishe disangisha bwà dilòlòlò edi. Bu Nzambi mwà kwanyisha, netùcyènzè. Nèngiikalè kaaba aka dilòlòlò edi, bwà kwakula, byòbì ànu bisànkishe mpaasàtá. [Mwanèètù Neville ùdi wàmba nè: "Eyowà's, mukalenge!"—Muf.] Nènku ndi muswè kwakula pa nè: *Musàmbi Awu Mmulwè*, dilòlòlò edi. Nè pashìishe aci's ndisangisha dyà dilòlòlò edi. Nènku tudi nè mudimu wà mèèsà à Mukalenge kaaba aka dilòlòlò edi. Nè bantu bònso mbabiikidibwe nè mwoyi mujimà bwà kulwa nè—nè kwangata mèèsà à Mukalenge aa pàmwe neetù dilòlòlò edi, nè bwà Diyiisha.

24 Cìvwa mmu movù wà bintu bitòloka mushààle pàmvwà nsanganyibwa mu Alaska, anyì pabwìpì nè Alaska, mu Colombie Britannique, ku...bwà masangisha, bwà nè Mukalenge mmutùpèeshe cikondo cyà butùmbi cyà dikèma. Nè ntu—ntu misangu yònsò munangè kupatuka kuya mu bisuku.

25 Nudi mwà kungumvwa bimpè lwà mu ndekeelu mwàmwa anyì? Nudikù mwà...Nwènu mwà kuumvwa, elààyi byanza byènu muulu, lwà paanyimà pààpa.

26 Ntu misangu yònsò munangè kupatuka kuya mu bisuku. Bu mùdì muntu yònsò udi mumanyè dikù dyètù, mmumanyè nè kùdi...Mààmù wanyì, udi upùnga nè lufù kuntu kwàka mpindyewu awu, mamwèndè ùvwa Indienne. Kàdi dikùdimuna dyànyì dyà mucima kaditukù dicishintùlùle to, nè ndi...dinanga dyànyì bwà kuya mu cisuku; nènku ndi nè disànkà, bwalu mmwaba wùndì mmòna Nzambi. Ncitu ntàmba kuya menemene bwà kulemba nyama to, bitu—bitu mbwà kushààla nkààyanyì nè Nzambi. Nènku ntu ndemba nkààyanyì.

27 Nènku pàmvwà nsanganyibwa kuntwaku, mèmè kutwilangana nè balombodi kampàndà balenga bàà dikèma. Abu's mbantu, mu Canada nè mu myaba kampàndà, kumpàlà kwà wèwè kubwela mu cipèèlà, biimikila mudimu wà nyama bàdi bàkupèesha mulombodi. Nè mulombodi awu ùdi nè cyà kwikala neebè.

28 Ke mèmè kutuutakeena nè mwanèètù wa balùme mwena Kilistò mulenga wa dikèma, nsongààlùme, wa cyena mpenta, uvwa mulombodi mumanyike bimpè mu Canada. Mukàjèndè ùvwa mukàjì wa butùmbi, musùngidibwe. Nè yèyè ùdi nè bidimu bitwè ku makùmi ànaayi, nè ùvwa nè bàna bakesè

bàtaanu, bânà bakesè bàà balùme, kuumukila ku bidimu dikùmi nè mwandamukùlù kupweka too nè ku bidimu bitwè ku bibìdì. Nènku bàvwa bamwanyishile citùpà cyà diitu cinène cyà kilòmèètà nkàmà mwandamukùlù cyà Njila wa Alcan, bu cyèndè cipaapu cyà bulombodi.

²⁹ Kùdi ba-Indiens muntwamu, bàvwà kabàyi baswè kupàtuka, kàdi bàvwa nè dyambu dyàbùngì be, nènku batèèke cimanyinu kuulu nè: “Wèwè mubwelè mwab’ewu, mashi nédiibwè panshi.” Kàdi, nànsha nànkù, twakendesha mashingi kucipita, nè kwalukila, bwalu mvwa muswè kuyiikila nè ba-Indiens abu. Twamb’eku twamb’eku, buloba abu bùvwa bwàbò kumpalà kwà kwikalabù bwètù twètù, nudi bamanyè’s. Nènku twàkapicila mu cikondo cyà dicyònkómoka naabò, mu muvù wà bintu bitòloka mushààle awu, mbàmbila bwalu bwà Mukalenge Yesù.

³⁰ Kàdi mukùlumpe kampàndà, taatù mukolè wa cifuku, ùvwa nè bidimu biipacila ku lukàmà. Ùvwa nè wendè . . . Mvwa mwà kumòna bwà cinyi kàvwa muswè kuya to. Bàvwa bàjiike bafwè bààbò mu citùpà cyà mucì, nè bàkùdike citùpà cyà mucì aci kuulu kwà mucì. Bàvwa nè bânà bakesè bàbìdì bajiika muntwamu. Mu bushùwà bwà bwalu, kàvwa muswè kuumuka to. Ndi mwà kumòna bwà cinyi kàvwa muswè kuumuka to. Nènku diitu adi, bukalenge bwà—bwà ditùnga dyà Canada, Bukòòkeshi bwà Canada kwambabò nè: “Bòbò baditàmbishe, nebàbàpàtùlè ànu muntwamu nè kubiiipata.” Mòna’s, kanwèna baswè bwà bòbò kwenza nànkù to; bânà bààbò balembeleja muntwamu mu micì.

³¹ Nànkù awu, nànsha nànkù, misùlù yàkapweka è kutùpangisha nènku katùvwa mwà kufika munda mwà citùpà cyà buloba mutùvwà tuya kalemba ours mufiikùlùke amu to. Mukalenge Southwick ewu, Southwick ki dîna dyèndè, ke ùvwa mulombodi. Nènku yèyè . . . Nènku mvwa nè mwambi mukesè, Eddie Byskal. Nè pa nànkù mwanèndè wa balùme . . . Mukalenge Southwick ùvwa nè—nè mwakùnyèndè wa balùme wa, wa bidimu bu pankaci pàà makùmi àbìdì nè bitaanu nè makùmi àsàtù, ùvwa mumwènenà kùdi ciseki bikolè menemene.

³² Mukalenge Southwick wáfùmu ku dishààla mwena Kilistò, kùdi bu cidimu cijimà nànkù awu. Ùvwa kumpalà mwendeshi wa nyama, nè mbenze bu bakàyàbàle, nudi bamanyè’s, mu nsòmbelu wabò. Nènku, kàdi yèyè ùcivwa ànu ùfuma ku dilwa mwena Kilistò, nè ùvwa wìtabuuja. Ke yèyè kwamba nè: “Mvwa mubalè mukàndà wèbè awu, Mwanèètù Branham.” Kàdi kutùngunukaye nè kunungana, njila mujimà awu, bwà mwakùnyèndè uvwa nè ciseki awu. Yèyè nè: “Kaa, ngiikalakù ànu mwà kutwàla mwakùnyàànyì ewu kùdi’s wè!” Èè, s’udi mumanyè mùtùbi byènza nè ùdyùmvwè, kùyì pabwàsà, kùyì mwà kwenza cintu nànsha cìmwè to, kàdi udìkonka ànu mùshindù wùdì byònsò mwà kwenzeka.

³³ Pashiishe mu Canada, pa ciibidilu bantu bàdi...Nwènu balùme bàdi bàpàtuka nuya mu ngendu, nudi bamanyè's, mu dikwàta dyà mudimu nè tùbalù. Nè mèmè's ntu munangè tùbalù nè nyama. Bàtu pa ciibidilu bàswikila mwonji ku mukila, nè bàtùlekela twènda mu mulongu, cisumbu cijimà mu mulongu. Kàdi kwàka kwèna mwà kwenza nànkù to, bwà lubwebwe lwà kale lwele mitanta alu; udi mufwànyine kujimija kàbalù kàmwè, udi mufwànyine kujimija cisumbu cijimà. Pa nànkù bikèngela ànu bwà twètù kutùlekelela tuya, pashiishe kutwàluja mu kajila amu.

³⁴ Nènku mvwa nsanganyibwa kule paanyimà apu, pa kàbalù kàà citende, nteeta kusàka tùvwà tupàmbùke atu bwà kutùpingajamù. Ke Nyumà Mwîmpè, mu ngàsà Wendè, kutùluka. Mèmè kwambuluja nè kàbalù kàànyì, nè kubànda kupita mulongu mujimà, mutàngile kùvwà Mukalenge Southwick uvwa ntùngàmùlòngù, kumpàlà aku, mu cipuka amu. Ki mèmè kwamba nè: "Bud?"

Yèyè nè: "Èyowà's, Mwanèètù Branham."

Mèmè nè: "Udiku mwà kwitaba díyì dyànyì anyì?"

Yèyè nè: "Mu cyònsò cyùdì wamba."

³⁵ Ke mèmè nè: "Ndi nè EMU MMÙDÌ MUKALENGE WÀMBA bwèbè wèwè." Mèmè nè: "Ndà ùkàngàtè mwanèènu wa balùme ku Fort Saint John," udi mu ntàntà wa kilòmèètà cinunu lukàmà nè makùmi àbìdì anyì cinunu nkàmà yìbìdì nè makùmi mwandamukùlù, "ùlwe nendè mu cibeeba eci." Nènku ùvwà musòmbèle mu kazùbù kàà kale nè dicyùwà dyà kale kuntwaku bwà kwipikilapù, ùvwamù nè bàná bèndè. Ke mèmè kwamba nè: "Musangu ànu wà kumpàlà wùdiye ùya ciseki, ùmuvùùle mutèèlù wèndè wùdiye naawù pambidi awu. Nènkupèèshè cintu kampàndà cyà kwenza. Ùwèlè mu kapyà, wamba nè: 'Ndi ngèenza nùnkù mu Dìná dyà Yesù Kilistò.'"

Yèyè nè: "Nèncyènzè."

³⁶ Ki kuyayè, kutùmayè muntu bwà kwangata mwanààbò awu, kulwa nendè kuntwaku. Kàdi mu dindà adi ùvwà nè cyà kuya mu kajila kampànda, nè muntu kampàndà mwena midimu yà mu meetu amu. Nè mwanààbò ùvwà pa ciibidilu ùya ciseki misangu yìbìdì anyì yisàtù, ku ditùkù, nè ùvwà naaci kacya ànu pàcìvwàye mwànà mukèsè wa balùme. Kàdi mukàjèndè ùvwà ùmumvwa bwòwà wàmba kufwà, pàvwàye ùya biseki apu, bwalu ùvwà ùlwa nè cikisu; nsongàalùme wa dikàndà dyàbùngì.

³⁷ Ke kuyayè ciseki, paanyimà pàà Bud mumanè kuumuka. Pamutù pàà mukàjì kutùpikila ku didìdiishì kuya lubilu, mùvwàye wèenza pa ciibidilu, ùmùsha bàná bèndè pabwìpì, kumutùpikilayè ànu pambidi mukòlu eku mukòlu eku, kàdi kumuvùùla mutèèlù; mukàjì mukèsè, mùle tètè nè Nyumà Mwîmpè, kumukòpolayè mutèèlù nè kuwùkùpayè mu kapyà, wàmba nè: "Ndi ngèenza nùnkù mu Dìná dyà Yesù Kilistò." Kacya

yêyè kàtukù mwanji kupaluka kàbìdì to kwambwila ànu dîbà adi. Cìvwa mmu movù wà bintu bitòloka mushààle ewu.

³⁸ Misangu yàbùngì, ndi mumanyè nè bitu bikolè ndambù. Bantu bàdì kabàyi bafwànyìne kuumvwa to, bàdì bàmba nè: “Mwanèètù Branham, bwà cinyì udi muswè kwenza lwendu lwà bulembi?” Nwamònu’s, kabèèna ànu bùmfvwa to. Kabyèna nè dikwàcisha bwà wèwè kuteeta kucyùmfvwija to, nwamònu’s. Udi ubàkula bantu kuntwaku bàvwà kabàyi mwà kwikala babàkùdìibwe to.

³⁹ Kùkaadi ngondo mitwè ku yìbìdì nàнку, anyì menemene to, mèmè kutàbuluka dindà kampàndà. Ndi ngèèla meeji nè, ncyèna mutwishiibwe to, nkàadi mucilondèle bààbùngì bàà mu èkèleeziyà. Kùdì bààbùngì mwaba ewu bàvwà bangumvwe ndonda bwalu ebu kumpàlà kwà kwenzekabù. Nènkù mu cìkèèna-kumòna cingàakamòna, nè mvwa mumòne nyama munène, mufwànàngàne nè kashà. Nènkù ùvwa nè nsèngu minène, mitùmbùke. Nènkù bìvwa . . . Byàkakèngela bwà mèmè kukanyùnguluka ku luseke, lwà dibwe kampàndà dipelùke, mùshindù ewu, bwà kufika kùdìye. Nè ùvwa nyama mwende luumu. Ùvwa nnyama munène wa civùlukilu. Nè kùvwa muntu kampàndà ùmvwà mumòne uvwa mulwàte mutèèlù wà màyi à matàmbà, wà tuzùbutuzùbu. Ke pashiishe, mu njila, paanyimà pàà mèmè mumanè kupeta nyama awu, Mvwa muumvwè diyì kampàndà—kampàndà dyàmbe nè: “Nsèngu ayi yidi bule bwà byàlà makùmi ànaayi nè bìbìdì.” Ayi’s nyà butùmbùke ebu. Nè ùvwa nyama wa katankù. Kàdì mu njila wa dyalukila, mèmè kumòna ours munène wa lwonji mufiikùlùke wa cisengàsengà.

⁴⁰ Mpindyewu, ke ours mwendè luumù nyêyè awu. Yitu yinaayi mu dîkù dyà ours mufiikùlùke ayi. Umwe ke ours wa cisengàsengà, utu mwendè luumù. Udi ulonda ùdì ùbìikidiibwa, dîna dyà beena kalaba, *kadish* (?), udi mufiike, mwikale nè dici dyà cijèngù; mwibìdì awu. Mwisàtù, ng’wa ciibidilu wa mufiikùlùke mutwile, udi pankaci pàà mufiike nè mufiikùlùke, ours wa katankù. Nè udi ulonda ke Kodiak, udi usanganyiibwa mu Cisanga cyà Kodiak nè—nè mu wesètè wa Alaska mwàmwa; yêyè’s mmunène, wa katakuji, mutàmbe bunène wa ku ours yònsò, kàdì ngwa mufiikùlùke. Kàdì wa cisengasenga mmufiike, nè citùpà citòòke cidi pa . . . cisengasenga citu lwà ku lusongo lwà myòsà aku. Yêyè’s ke ours mwende luumù awu, wa cilunji cìkolè, wa cilunji cibi.

⁴¹ Mèmè kwasa ours awu nè dizajì dyashila ku mwoyi, kumushipa. Kàdì mvwa ndikonka bwà kaacingoma kakesè kàmfvwà nààkù aku, bwà nè ní kààmushipa’s. Nènkù mvwa mwambile bàna bèètù abu. Mbanganyì mwab’ewu bàvwàku bùmfvwe ndonda bwalu abu kumpàlà kwà kwenzekabù? Elàayi byanza byènù muulu. Èè, mu bushùwà bwà bwalu, ciibùngì cyàbò, nwamònu’s.

42 Ke pashiishe Mukalenge Arganbright kumbiikilayè nè kujingayè bwà kuya ku Alaska. Èè, pamutù pàà kuya ku Alaska, Mémè kudyumvwa mulombòdiibwe bwà kwalukila ku lwendu elu, lwà kuntweku nè Bud, bwalu mvwa mumulayè.

43 Pàngààkafikà kuntwaku, mémè kwambila mukàjèndè nè bantu bònsò bàà mu nyungulukilu amu, bintu bìvwà Ye mwàmbe ebi. Mémè nè: “Kàdi, mpindyewu, nganyì wa kunùdì aku udi nè mutèèlù wà màyi à matàmbà, wa tuzùbutuzùbu?” Muntu nànsha umwe kàvwa naawù to. “Èè,” mungàakambà, “dìbà adi’s bìdì nè cyà kwikala lwendu lukwàbò lùnngènza. Kàdi, mu mwaba kampàndà, Mukalenge nèacimpèèshè, ànu menemene.” Kì mémè kwamba nè: “Mvwa mwele meeji nè ncifwànyine kwikala lwendu elu.”

44 Èè, twètù kuya, mu lwendu alu. Nènku ditùkù dyà kumpàlà, patwàkafikà mu butùmbùke, kuulu kwà nsongo yà meetu ayi, mwaba wùdì kawùyi mici to, lwà mu mabwe à mashika mwàmwa, nè tùbalù twètù. Nè ditùkù diibìdì, twètù kulemba ndambù, nè twètù kusangana mikòòkò bùngì kabùyi kwamba nè myòsà yà mvwàngala miikàle nè byàbinaayi bisàtù, nè bikwàbò, kàdi kabìvwa ànu bimpè to.

45 Kàdi nwènù bàmbambà bwà bwobùmwe kampàndà, yònsò wa kutùdì mwena mpenta nè mwikàle nè Nyumà Mwimpè! Tuvwa bapete cikondo kampàndà kuntu kwàka, nè kumòna meekala awu munkaci mwà kushintuluka, nè mikùnà ayi, lwà kuulu menemene kuntwaku mùdì ànu Nzambi nkààyèndè musòmbèlemù’s! Nè cikondo cyà dikèma kaayi’s wè! Katùvwa tuya kalààla to too nè pa dìbà ùmwè jaajaaja wa dindà, ànu tutùmbisha Nzambi nè tupicila mu cikondo cyà butùmbi’s!

46 Nè mu ditùkù diibìdì, twètù kupàtuka. Nè mu ntàntà wa kilòmeètà mitwè ku citèemà nè citùpà nànkù, lwà paanyimà pàà mabwe à mashikà awu, twètù kumòna ndambù wa bimpàngà byà mikòòkò binène. Ke yéyè nè: “Èè, netwàlukilè, nènku mu dindà òvwà dilondà pàvwà kwisù kùbanga kutòòka tuvwa bafwànyine kwikila mu njila.”

47 Nànkù ke twètù kwasa lwendu pàakacyàbu mu dindà, kumpàla kwà panshi kutòòka; nènku tufika, lwà pa dìbà citèemà jaajaaja, tuvwa lwà kuulu aku twenda tubànda kuulu kutùvwà bamòne mabwe à mashikà aku.

48 Kàdi mu njila twenda tubànda, mémè kumòna mbowà wanyì wa kumpàlà wa cisuku. Kacya ncìvwakù mwànji kumòna nànsha umwe to. Nkààdikù mumòne yà mimuna, mu Lapland mwàmwa, nè bikwàbò, kàdi kì n’caribou to; cidi kaciyi. . . *Caribou’s* ndinà dyà beena kalaba, mbwena kwamba nè “kashà kàà mpànga.” Nènku ke pa ciibidilu tùtu nè nsèngù yà mpàndà, mùshindù ewu, lùmwè lùbàndila ànu lwà mumpàlà lwà pa dyùlu dyàkù apu, nè pashiishe lupàndà lùdì lùpàtukila lwà mumpàlà emu;

nè pashiihe nsèngù yikùlamakù, nè lupàndà lukwàbò lwalàbàle bikolè.

Bud ùvwa mungambile nè: “Pàmwāpa . . .”

49 Mémè nè: “To, to. Yéyè . . .” Mémè nè: “Kacivwa mbowà to, bwalu kacivwa nè nsèngù yà mùshindù awu to.” Kàdi mu dindà adi, mu dibànda amu, mōna’s, mémè kumōna ngombe nè kànà kàà ngombe. Ke twètù kuya lwà ku luseke kampàndà, nènku mémè kumumōnà, ngomba-ngòlè wa citende, munkaci mwà kuya lùbilu.

50 Nènku Mwanèètù Eddie, ùvwa ujinga kudiisha ba-Indiens bàà kùdiye mpàndànjlà aku. Ke muntu mulenga awu’s, ùfùmina mu díkù dilenga, nè mukàjì kampàndà ùpàtukila ànu mu díkù dilenga dyà mpàci. Nè mabòkò àbò makunya *muntwamu*, nè mpùtā, nè njijji, mwaba wùdìbò basòmbèlè nè ba-Indiens nè bikwàbò, kuntwaku ùteeta bwà kutwàdila ba-Indiens Kilistò. Bikèngela ngàsà bwà kwenza nànkus! Bālāādila mwāmbà wà tumbele nè musàbù wà nsùkaadi, nè bàlāāla mu mitàndà mùdì byùpù, nkùpà nè bikwàbò byònsò, bàbìdya ànu mùshindù awu, nànsha nànkù, bwà kutwàla Èvànjeeliyò wa Yesù Kilistò!

Nènku ki Mwanèètù Eddie kudifindayè lwà ku kakùnà aku.

51 Ke mémè kushāāla musòmbè mwaba awu ànu mu kaneemu, munda mwà mèbà àbìdì, pangāākamōnà mukùnà munène mubwikila ku lusongo aku kùdì nèjè. Mémè kudyāmbidila nè: “Mukalenge Nzambi, enzaku bwà ngīkalakù mwà kusòmbela mwab’ewu mu Bukalenge bwà bidimu cinunu.” Kumōna micì yà peupliers yà kàlaabi ayi lwà kwīnshì kwà kakùnà aku, nè céanothe yà mikùnze ayi, nè byònsò bisambākānemù nè nsongo yà mikùnà mibwikila kùdì nèjè ayi, bileejiiibwa mu majiba à māyì amu. Kùdì ànu cintu kampàndà pa bwalu abu, mùshindù wùdì mwà kusòmba mwaba awu kàdi kwasa mwadi, nè kudila, nè kudila, bwalu ànu Nzambi nkāāyendè ngudi mwà kuzòla cyòci aci. Kakwèna cintu nànsha cimwè cìdì mwà kucyèenza to, nwamònu’s.

52 Nènku mwva musòmbè mwaba awu, kwenzekabi nè ngèlè meeji nè: “Èè, ndi ndikonka nè Mwanèètù Eddie ùdì penyi?”

53 Mémè kuya kùdì Bud, nè ùvwa musòmbè mwaba awu ùcyònkòmekelamù, yéyè pèndè, bu mu mèbà matwè ku àbìdì nànkù awu. Ke twètù kujuuka, nè mémè kumōna cyamù cyà fòtò cyà Eddie citèèka ànu mwaba awu. Lwà ku lusongo lwà mikùnà ayi, kakwèna cīngà cintu to ànu bisoosà byà mbowà, ànu bisoosà, nkuulu mwaba wùdì micì kayiyi mwà kutòloka to.

54 Ke mémè kumumōna kwīnshì kwà kakùnà aku. Ùvwa mwele minu muulu mùshindù *ewu*, ùvwa munkaci mwà kujikangana nè mbowà wa mpānga. Èè, yéyè—yéyè kwasa mbowà awu. Ke twètù kumusaaya ànu, nè twètù kwalukila pa kakùnà aku. Ke mémè kupweka lwà kwīnshì bikolè menemene bwà tūpetè ndambù wa māyì.

55 Nènkú mvwa ànu nkènzakana nè tulòndò. Mu mùshindù kampàndà, mu ntàntà wa wipacila kilòmèètà yisàtù kule naanyì, ke nyama wanyì ewu mulààle panshì apu. Mémè kumumòna. Mémè nè: “Nyèyè awu. Ke yèyè awu’s.” Mémè nè: “Tàngilà kùnweku, udi mumòne lubwebwe lwele mitanta elu’s, bikèngela bwà tũyũnguluke tũye ku luseke lwàlwa.” Ke mémè nè: “Cintu cìmwèpèlè cìdi ànu wà màyi à matàmbà, nè tuzùbutuzùbu. . .” Ke mémè kutàngila, nènkú’s Eddie ùvwa mulwàte mutèèlù wà màyi à matàmbà, wà tuzùbutuzùbu.

Mémè nè: “Eddie, mvwa ndyàmbidila nè wèwè. . .”

56 Yèyè nè: “Mwanèètù Branham, ncìvwa mumanyè to. Mukàjàànyì ngudi nè cyà kwikala muwélè muntwamu.” Yèyè nè: “Ndi mwàngate mutèèlù musukula mu dindà emu, kàdi ncìvwa mumanyè aci to. Mukàjàànyì ngudi nè cyà kwikala muwélèmu.” Nzambì kàtukù ùpangila cintu nànsha cìmwè to. Yèyè mmupwàngane ànu menemene. S’ki yèyè awu nè mutèèlù wà màyi à matàmbà, wà tuzùbutuzùbu awu.

57 Mulombodi kwambayè nè: “Mwanèètù Branham, ncyèna mumanyè mùdi mwà kuseemena pabwìpi nè aci to.”

58 Mémè nè: “Nànsha yèyè mwikàle mu ntàntà wa kilòmèètà makùmi mwandamukùlù, yèyè’s ngwanyì mémè!” Mémè nè: “Ngwanyì mémè.” Ke twètù kutwàdija kunyunguluka lubwebwe lwà mitanta alu, ànu, kaa, lwìnàname *nànkú*, ànu ku nseke yònsò.

59 Ke twètù kufika kuntwaku, ke mémè kupeta mbowà munène awu. Kàdi—kàdi pamutù pàà kwikalayè nè mpàndà ayi, ùvwa nè mìsongolo; kacya ncitukù mwànji kumòna wa bwena awu to. Nudi numòna mùdìbi byà pabwàbi, mùdi Nzambì wènza maalù anyi?

60 Ki twètù kwambila nsongààlùmè bwà kupwekayì mu lupòngò amu bwà kwangata tũbalù nè kwambula munyìinyi, bwà kutwilangana neetù kwínshì aku patwikala mwà kutùluka. Bwalu, Mwanèètù Bud wàkakènzakana, kwambayè nè: “Cikèènà-kumòna cyà Mwanèètù Branham, pìikalàbi nè cìvwa cilelèlè bwà nè mwanèètù wa balùme mmwondòpiibwe, ku ciseki, yèyè’s neàpete nyama awu nànsha yèyè mwikale penyì.” Ki kwambayè nè: “Nwènù nutuutakeenè ànu neetù, twètù netwikalè nendè, mu dipweka kuntwaku.”

61 Nènkú patwàkamulamunà cisèba cyònsò; nè cisèba nè nsèngù, nè byònsò, bìvwa mwà kwikala bìipacila ku kilò makùmi àtaanu nè yisambòmbò nè byà mu njila; kàdi ànu, kì ncisèbà cyà mubidi to, ànu cisèbà cyolola. Ki díbà adi kwambayè nè: “Mpindyewu, Mwanèètù Branham,” yèyè nè, “ndi muswè nkukonkèku cintu kampàndà.” Yèyè nè: “Bìvwa binkolèle bwà mémè kumusaaya mwab’ewu,” yèyè nè mémè bùbìdi bwètù, muntu yònsò ku lwèndè luseke. Yèyè nè: “Wàmbi nè nsèngù eyi yidi ‘byàlà makùmi ànaayi nè bibìdi’ anyi?”

Mémè nè: “Èyowà’s, mukalenge.”

Yèyè nè: “Yìdi yìmwèka bu makùmi citèèmà, bwànyì mèmè’s.”

Mémè nè: “Yìdi makùmi ànaayi nè yìbìdì.”

Ke yèyè nè: “Ndi nè metèlè à dipima naawù mu cibuta cyànyì cyà cibàsà cyà disòmbela amu.”

Mémè nè: “Èyo, nèùmòne nè mmwômò menemene.”

⁶² Yèyè nè: “Dìbà adi, bilondèshile cyûvwà mungambìle, mwaba kampàndà pankaci pàà mwab’ewu nè mwaba wutùdì tutwilangana nè bânà bàà balùme abu, mulwàte mutèèlù wà mâyi à matàmbà awu, nèupetè ours mufiikùlùke wa cisengasenga anyi?” Yèyè nè: “Kacya ncitukù mwânjì kumòna nànsha umwe to, pànyì’s ntu musòmbèle mu mikùnà eyi kacya bàndela.”

Mémè nè: “Kàdi’s ng’EMU MMÙDÌ MUKALENGE WÀMBA.”

Yèyè nè: “Udi mumanyè mwaba wùdiye ùsanganyibwa anyi?”

⁶³ Mémè nè: “To. Kàdi ùdi mwaba kampàndà pankaci pàà mwab’ewu nè nsongààlùmè ayi.” Tuvwa mwà kumòna buludi too nè kwînshì kùvwàbo aku, lwà mu ntàntà wa kilòmèètà yinaayi nè citùpà, kwînshì mwaba ùvwà micì mitwàdijile. Mémè nè: “Netùmupetè.” Mpindyewu, aci’s ncintu kampàndà!

⁶⁴ Yèyè nè: “Dìbà adi, netùfikè kwînshì kwàka mu dìbà dijimà nè citùpà. Nènku udi uswa kungambila nè nèupete ours munène wa katankù mufiikùlùke, wa cisengasenga awu, mwaba kampàndà pankaci pàà mwab’ewu nè nsongààlùmè ayi?”

Mémè nè: “Aci’s bilondèshile Dîyì Dyèndè.”

Yèyè nè: “Ùdipù.”

⁶⁵ Ki twètù kwambula nsèngù ayi, kuyitenteka pa mitù yètù, nè twenda tuyìpulumuna ke twètù bàdì bàpweka nè kakùnà aba, too nè mutwàkafika ku mabwe à mashikà. Kàdi patwàkafika ku mabwe à mashikà awu; kùvwà luuya lukolè lwà dikèma, bìvwà bikèngela bwà twètù kubwela mu mabwe à mashikà awu ndambù, bwà kupetakù citaleela. Twètù kupicila pa dibwe dyà mashikà adi, kupweka too nè mutwàlu kufika mwaba wùvwà mâyi àpàtukila mwînshì mwà dibwe dyà mashikà adi, nè kupweka too nè mu. . . kutwàdija kubwela mu diitu dyà micì amu. Twètù kusòmbela ànu panshì, bwà kwikisha.

⁶⁶ Mémè kùkùdimuka, è kutàngila. Mémè kwamba nè: “Tàngilà, Bud! Byenze ànu bu ngombe, mu ntàntà wa wìpacila kilòmèètà mitwè ku yìsàtù nè citùpà.”

⁶⁷ Kubàndishayè tulòndò atu, kutàngilayè, kwambayè nè: “Mwanèètù Branham, ndi ngambilamù’s, ng’ours wa

cisengasenga's!" Yèyè nè: "Mutàngile umòne mùdiye ùbàlakana mu dībà adi!"

⁶⁸ Mémè nè: "Nyéyè awu." Mémè nè: "Èè tuyaaku tükamwangàtè." Nànkú's, ke citwàkenza ncyòci aci, twètù kuya kamupeta. Bilondèshìle, mu cìkèèná-kumòna, dībà dikaavwa diyè bikolè bwà kumusaaya, byàkakèngela bwà twètù kwindila nè paakacyàbù.

⁶⁹ Pashìishe paanyimà pàà twètù bamanè kupeta ours wa cisengasenga awu, twètù kwalukila, dībà adi kwambayè nè: "Nè udi wamba nè nsèngù ayi. . ." Yèyè nè: "Nsèngù ayi yòyi bule bwà byàlà makùmi ànaayi nè bibìdì, Mwanèètù Branham, nèngùuminyinè's."

⁷⁰ Mémè nè: "Kabyàkukèngela bwà wèwè kuuminyina to. Kàdì's, yìdi bule bwà byàlà makùmi ànaayi nè bibìdì, ke cidiyè." Ki twètù kupweka kwìnshì. . .

⁷¹ Ke mémè kudyàmbidila, mu cìkèèná-kumòna aci. . . Nwènù bānà bèètù bāà balūme bādì bēlè byanza byènù muulu, nè bānà bèètù bāà bakājì, katanci aka, bāvwa bangumvwè ngāmba bwalu ebu kumpālā kwà kwenzekabù. Mémè kwamba nè ùvwa nè cyà kwikala Billy Paul. Ùvwa mmwānà mukesè wa balūme. Nwènù bōnsò's nudi bavùlūke nè ngākamba nè: 'kùdi cianza cikesè kampāndā'? Kādì mwanèndè wa balūme ùdi nè bidimu dikùmi nè mwandamukùlù, nènku ànu bunène bwà Billy Paul. Nwamònu anyì?

⁷² Nènku ndi mwenze ànu mfika kwìnshì aku, ke Eddie ewu mwimāne mulwāte mutèèlù wèndè wā māyì à matāmbā, wā tuzùbutuzùbu. Mémè kumòna cianza cikesè aci cinyunguluka nsèngù ayi, nè pàākayāye apu nè kupeta metèlè wa dipima nendè awu, kuādijayè panshì mwab'ewu, nè kukwātayè, mwānà mukesè wa balūme awu kutèekayè byanza byèndè. Mémè nè: "Tàngilā, Eddie, byanza bikesè abi pa lusèngù." Kādì pàākapulumunāye metèlè wa dipima nendè kumujuula mùshindù ewu, yèyè kuntàngila kādì mishìku kumutòòka tòò, kwambayè nè: "Mwanèètù Branham, tàngila kunweku's! Ànu pyòpyopyò, byàlà makùmi ànaayi nè bibìdì, menemene!"

⁷³ Nudi bafwānyine kwamba nè: "Mwanèètù Branham, bwà cinyi udi wamba nānku mu kālaasā kāà Dyālumingū?"

⁷⁴ Ndi ngamba eci mbwā kabingilā aka. Kale mu Dipungila Dikùlukulu mwāmwa, beena meeji bāà kale nè baprófètā bākaadì bafwè abu, bāākakuukwila Nzambì wa mu Dyulu, Yèyè wākabāleeja bikèèná-kumòna awu. Bāvwa banangè Nzambì, ku ngāsā Wèndè, uvwa mubānangè awu. Bāākajinga bikolè Cimenga kampāndā mwaba kampāndā. Cintu kampāndā munda mwàbò! Bāākashìya mbānzā yàbò nè kushāāla beena lwendu, bwalu bāvwa bènda bākèbangana nè Cimenga mwaba kampāndā. Bāākamba bintu bitùdì tumòna byènzeka leelù ewu ebi.

⁷⁵ Nzambì umwèumwè Uvwa mubàangè, nè ku ngàsà Wendè, nè mwenzè bintu abi awu bwàbò bôbò, n'Nzambì umwèumwè utùdì tukwàcila mudimu kaaba aka mu tabernacle ewu mu dindà emu, wènza bintu bîmwèbîmwè abi. Kàdì's kùdì, munda mwètù, dijinga dinène bwà Cimenga aci, mwaba kampàndà kwàkayabò aku. Nè ku Dìyì Dyèndè nè ku bimanyinu byà Bukolè Bwèndè, nè Nyumà umwèumwè awu nè bipròfètà bîmwèbîmwè abi, cintu cîmwècîmwè cyàkabènzèlèYe kale wàwa aci, Yèyè ùdì munkaci mwà kutwènzela leelù ewu. Nènku nudi nuci mòna nè cijaadiki cìdì kacìyì cìpangila, cyà nè n'Nzambì nè Bulelèlèlè bwà Nzambì.

⁷⁶ Pa nànkù, mwaba kanà wònsò wùdì Cimenga cinène aci cisanganyibwa, nè mwaba wònsò wùdìbò badisangishe awu, ndi ntèkemena bwà kumòna mààmù wanyì udi upunga nè lufù awu, nè nwènù bònsò pàmwè naabò, mu Cimenga aci amu pàmwè nè bôbò abu: Abraham, Izàkà, Yakòbò, Danyèlè, Yeshàayi, Yelèmiyà. Bwalu, ngàsà umwèumwè wa Nzambì uvwa mubàangè, nè mubàpèèshe bikèènà-kumòna, nè mubàleejè bintu bìcìvwà bilwa awu, n'Nzambì umwèumwè awu leelù ewu mwikàle ùtwènzela cintu cîmwècîmwè aci, Bulelèlèlè bùdì kabùyì bùpangila to! Cyòcì aci m'Bulelèlèlè, mulundà wanyì.

⁷⁷ Taatù wetù wa mu Dyulu, tudi nè kusàkidila. CyŬvwà Wèwè muswile bwà mèmè kupeta bintu abi, ngèèla meeji, Mukalenge, nè Wèwè uvwa ànu unkolesha ku mwoyi, mumanyè nè kùvwa cìkùmìnà cìvwà cìlwa. Ncyèna mumanyè to; Wèwè ngudi mumanyè. Nè mèmè ndi mumanyè nè ncicyenà kàbìdì nsongààlùme to. Ncicyèna mwànà wa balùme mukesè ùvwa nè ciibidilu cyà kulamata maman ku dipùùpilà awu to. Kàdì nkaadi muntu mushindàme mpindyewu. Kaa, mùshindù mwinè wùndì muKunangè's, Mukalenge! Mùshindù mwinè wùndì nKwitabuuja's! Tùpèèshèku ngàsà mpindyewu. Tùkwàcishèku bwà kulongesha Dìyì Dyèbè, bwà bakwàbò bààmònakù nè bààyiila, nè bààmanya Bwèbè. Tudi tulòmba mu Dìnà dyà Yesù. Amen.

⁷⁸ Bwà cyena-bwalu, mu dindà emu. Ngèèla meeji nè ke byònsò bîmvwà naabì, ànu... Èè, masangisha à dilòdòlò edi, mèèsà à Mukalenge, dyoweshangana dyà màyi ku makàsà, nè bikwàbò, kwajikì. Ndi munùbìikile bwà kushààla nè kwikala neetù. Kàdì, bwà cyena-bwalu cyètù mu dindà emu, tùbuululàayi mu Bible, mu Maatàayi Munsantu, nshapità mwi3, bwà kubala citùpà cyà Mifundu. Ndi muswè kubangila ku mvensà wa 10 wa nshapità mwi3 wa Maatàayi Munsantu.

⁷⁹ Nènku ndi mumanyè nè kùdì bààbùngì biimàne kuulu, nè bìdì bitùtácisha; kàdì bu bàmwè bàà kunùdì mwà kushintakajakù naabò kaaba, ku musangu nè ku musangu. Ndi... Mfwilaayikù luse bwà kwikala, mwangàte dîbà dyànyi, kàdì ndi... Nudi bùmvwè. Mpindyewu dibala dyà Mifundu.

...mpindyewu cisuuyi ncitèèkiiibwe ku muji wa mucì: kì bwà cinyi mucì wónsò wùdi kawuyi wùkwàma mamuma mîmpè to wùdi wùshimbudiibwa, nè wèdiibwa mu kapyà.

Ncyà bushùwà nè ndi nnùbàtiiza mu màyi bwà kanyinganyinga: kàdi ewu udi ulwa paanyimà pàànyi mmuntàmbe ku bukolè, mwena bisàbaatà bìndi ncìyi mukùmbanè mwà kwambula to: yèyè neànùbàtùzè nè Nyumà Mwîmpè, nè kapyà:

Mwena cipeepudi cìdì mu cyanza cyèndè...yèyè neàkezulè mu cibambalu cyèndè cyónsò, nè neàsangishè blé wendè mu diyeebà; kàdi yèyè neòshè bisòte nè kapyà kàdi kakàyikù mwà kujima to.

Pashùshe Yesù wa mu Ngalèlè kulwa ku Yadènè... bwà kubàtijiibwa kùdiye.

Kàdi Yone wàkamukàndika, wàmba nè: Bìdi bikèngela bwà mèmè kubàtijiibwa kùdi wèwè, kàdi wèwè udi ulwa kùndi mèmè?

Ke Yesù kumwandamuna kwamba nè: Itàbà bwà bìkale nànkù mpindyewu: bwalu mbitukumbanyine bwà twètù kukumbaba bwakane bwónsò. Nènku yèyè kumutwàla.

⁸⁰ Ndi muswè kwangacila cyena-bwalu ku dîyi adi mwaba awu mu mvensà wa 15.

...Itàbà bìkalè nànkù mpindyewu: bwalu mbitukumbanyine bwà kukumbaba bwakane bwónsò.

⁸¹ Misangu yàbùngì ntu ànu ndikonka nè mbwà cinyi, bùvwà Yesù wa mu Nazàlèetà...Nè misangu yàbùngì bàvwa bankonkè. Bwà cinyi bùdi Muntu bu Yesù nè cyà kubàtijiibwa? Bwà cinyi Mupèrsonà ewu mmufwànyine kubàtijiibwa bu cyenzedi cyà kanyinganyinga nè cyà ditonda, pàvwàYe Mwànà wa Nzambì udi nè mwoyi, kàyi katòba, kàyi musopakaja? Bwà cinyi bìvwa bikèngela bwà Mupèrsonà ewu kubàtijiibwa bu muntu ulwàlwa? Dìbàtiiza dîtù paanyimà pàà ditonda. Yèyè kàvwa nè ditonda dya kwenza to, bwalu Yèyè ùvwa Nzambì. Nènku, Yèyè, bwà cinyi byàkakèngela bwà kubàtijiibwaYè mùvwàYe mubàtijiibwe amu, “bwà kanyinganyinga,” bwalu Yèyè kàvwa dijinga nè kanyinganyinga to, bwalu Yèyè ùvwa Nzambì uvwa kàyi mwà kupangila awu anyi? “Yèyè ùvwa pa buloba, nè buloba bwàkenjiibwa kùdiYe, kàdi bàà pa buloba kabààkaMumanya to.” Bwà cinyi byàkakèngela bwà kubàtijiibwaYè?

⁸² Kàdi nuvwakù bamòne katùpà kàà cyambilu aku kumpalà kwà cyôci aci anyi? Wàkamba nè:

...bwalu mbitukumbanyine bwà kukumbaba bwakane bwónsò.

⁸³ Mu ngaakwilù mukwàbò nè: “Didi nè cyà kuula! Dìyì dyònsò didi Nzambi mwakùle, didi nè cyà kuula!” Nzambi kèna mwà kwamba cintu nànsha cìmwè kàdi kupanga kucikùmbaja to. PàdiYe muCyāmbè, mmudimu mujikija. Cìkaadi cimanè kujika pàdi Nzambi ùCyākula apu. Nzambi kacya kàtu wākula pàdiYe kàyi mudìlongolòle bwà cyòci kwikalakù; nè, pàdiYe wākula, cìkaadi cimanè kwenzeka.

⁸⁴ Mpindyewu, aci cyòci ní kí ncifwànyine kutùpèeshakù cishimikidi cyà kutèekelapù diitabuuja dyètù mu dindà emu's! Pàdi Nzambi wākula Dìyì kampàndà, dikaadi dimanè kujika. Kàdi bishi bwà milayì Yèndè yidìYe mutùpèeshe? Cintu cyònsò cidìYe mwāmbè, cìkaadi mudimu mumanè kujika. Nànku, ki bwà cinyì, patùdì twakidila Dìyì Dyèndè munda mwà mwoyi wètù, cìkaadi—cìkaadi cimana kwenza, cìkaadi cijikija!

⁸⁵ Kàdi mbwà cinyì bùdìYe dībà adi mufwànyine (kacyèna cyādamuna lukonko to) kubàtijiibwa's? Bààbúngì mbāmbè nè: “Mòna's, Yèyè's wākabàtijiibwa bwalu Yèyè nguvwa cileejilu cyètù.” Aci's ncilelèlè, mu cipidì kampàndà, mu mwaba kampàndà. Aci's ncilelèlè, kàdi kí m'Bulelèlè bwònsò to.

⁸⁶ Bulelèlè bwàci bìvwa nè, Yèyè nguvwa mubidi wa bwalu, Yèyè ùvwa Mwakwidi Munène. Nènku kumpàlà kwà mwakwidi munène kwikalayè mwela maanyì, bìvwa bìkèngela kusukudiibwayè.

⁸⁷ Ndi muswè kunùbadilakù ndambù wa Mifundu, bwà katanci kakesè cyanààna, mu Mukàndà wa Ekèsòòdè. Nè ndi ngèela meeji nè mmvensà wa 29 ùndì mufunde; nshapità wa 29's wè, èyowà. Nènku ndi muswè kubangila kaaba aka ku mvensà mwi4 wa nshapità wa 29.

Nè Aalòna nè bàna bèndè bàà balùme wèwè nèuye naabò ku ciibi cyà ntentà wa kusambakeena, nè nèubowèshè mâyì.

...wèwè newàngatè—wèwè newàngatè bilàmbà, nè kuvwàdika Aalòdòna, nè nkooci, nè mizàbì... nè efòdà, nè efòdà, nè cibwikilu cyà pa cyàdì, nènku bwà kumuswika mukàbà mukàyàbàlè wà efòdà:

Nè wèwè nèuteekè cifulu ku mutù kwèndè, nè pa wa cijila... pa wa... cifulu cyà butùmbi pa cifulu cyà ku mutù aci.

Nè wèwè newàngatè maanyì à dilaabiibwa, nè kuàpòngolwela pa mutù, nè kumulaaba maanyì.

⁸⁸ Nwamònu's, Aalòdòna, mwakwidi munène awu, kumpàlà mene kwà kwikalayè mwediibwe maanyì, bìvwa bìkèngela kusukudiibwayè nè mâyì. Ki bwà cinyì, pàvwà Yesù, kumpàlà kwà kwikalaYè mwediibwe maanyì, Mwakwidi wètù Munène, Ùvwa musukula nè mâyì.

⁸⁹ Nè pashiishe Maanyì à dilaabiibwa awu maMupòngolwela pambidi, bwà kuMulaaba maanyì. Mùvwà Aalòònà mulaabiibwe nè maanyì; Ùvwà mulaabiibwe nè Nyumà Mwímpè. “Bwalu Yone wàkafila bujaadiki, mumòne Nyumà wa Nzambi ùpweka bu nkuci, nè wènda ùpweka pambidi Pèndè; nè Diyì dyàmbe nè: ‘Ewu m’Mwan’Àanyì munanga Mwena munda mùNdi nsànkila bwà kusòmbela.’” Pa nànkù Bible mmwàmbè nè: “Yesù ùvwà mulaabiibwe kùdi Nyumà Mwímpè, wàkaya wènda wènda bintu bímpè.” Nwamònu’s, Ùvwà mwediibwe maanyì.

⁹⁰ Nènku kumpàlà kwà kwikalaYè mwediibwe maanyì, byàkakèngela bwà Yèyè kukumbaba bwakane bwònsò. Nwamònu’s, bìvwa bikèngela bwà Yèyè kusukudiibwa nè màyi kumpàlà kwà Dilaabiibwa kulwadi pambidi Pèndè.

⁹¹ Nènku ncimfwànyì cilenga be bwètù twètù leelù ewu, bu baakwidi bwà Nzambi. Tudi nè cyà kubàtijiibwa dyàmbedi, kutonda mpèkaatù yètù nè kubàtijiibwa mu Dìnà dyà Yesù Kilistò, kukezula mpèkaatù yètù; nè pashiishe nenùpetè Dilaabiibwa, dipà dyà Nyumà Mwímpè. Nwamònu’s, musukudiibwe dyàmbedi, nè pashiishe mulaaba bwà mudimu. Kabìvwa bikèngela bwà mwambi nànsha umwe kwikalayè mu cyambilu kàyi mubàtijiibwe dyàmbedi mu Dìnà dyà Yesù Kilistò to, bwalu, kùdi ànu . . . dilekelediibwa dyà mpèkaatù didi ànu mu Dìnà dyà Yesù Kilistò, to, kakwèna dīngà dīnà mwīnshī mwà Dyulu dipà bantu to. “Kanyinganyinga nè dilekelediibwa dyà mpèkaatù bìdì nè cyà kulongeshiibwa mu Dìnà Dyèndè, kubangila ku Yelusàlèma.” Ke mwaba wùdi Nyumà Mwímpè mupòne nè mulaabe, dyàmbedi. Pa nànkù, mwambi anyì mwena kwitabuuja kanà yònsò ewu ùdi dyàmbedi nè cyà kusukudiibwa ku mpèkaatù yèndè, mu Dìnà dyà Yesù Kilistò; nè pashiishe mulaaba nè Nyumà Mwímpè, bwà kupàtula bujaadiki bwà Nzambi.

⁹² Nè Kilistò nguvwa bujaadiki bwà Nzambi, bwalu Nzambi ùvwà munda mwà Kilistò, ùpungisha bàà pa buloba nè Yèyè mwinè. Mpindyewu Yèyè wàkamba nè:

. . . *Twàla bwà eci ciìkalè nànkù, Yone. Ncyà bushùwà.*

⁹³ Mu ngaakwilù mukwàbò nè: “Yone, wèwè udi muntu wa bukolè, udi mupròfetà munène, wa bukolè. Nè dibuulula dyèbè Bwànyì didi ànu Bulelèlè bwà menemene. Udi mumanyè nè Mémè ndi Nganyì. Udi mumanyè, bwalu mudimu wèbè wà bwambi kawùvwa wùfùmina kùdi muntu to. Mudimu wèbè wà bwambi wùvwà wùfùmina kùdi Nzambi. Kùtu muwùlongèle kùdi muntu to. Kùtu mulongèshiibwe eci mu sèminèrè kampànda to. Kàdi, nè bidimu citèemà, wakabwela mu cipèèlè, bwalu wèwè udi mulediibwe mwànà wa pabwèndè, wa mùshindù. Nènku ànu ku dilediibwa dyèbè mene aku, Nzambi wàkabanga kukwàta neebè mudimu. Nè kumpàlà mene kwà dilediibwa dyèbè, mupròfetà wàkakumòna. Nè wèwè udi

bukênkè bwà ditùkù edi. Kàdi mu cipèèlà... Udi mumanyè nè Mèmè ndi Nganyì, bwalu mu cipèèlà mwàmwa, Nzambì ùvwa mukwambìlè nè kùvwa mwà kwikala cimanyinu cyènda cìNdonda. Nè wèwè's ukàadi mumanè kuCìfidila bujaadiki, nè udi mucìmanyè. Nè tudi bamanyàngàne ewu cìdi mukwèndè. Tudi bamanyàngàne. Nè pashìishe mbulelèlà nè bìkèngela wèwè ùbàtijiibwè Kùndì. Kàdi twànji tutwàlè bwà bìikalè nànkù, bwalu, Yone, patwikalà twètù aba makênkè à ditùkù edi, tudi nè cyà kukùmbaja bwakàne bwònsò. Dìyì dyà Nzambì dyònsò dìdi nè cyà kuujiibwa kutùdì, bwà ditùkù edi, bwalu mbitùkùmbànyine; mbilààle kutùdì, mbikùmbànyine, mbitùfwànyine. Bwalu pìikalàbi nè twètù ke bantèmu balelèlà bàà Nzambì leelù ewu, Yone wa yààya, tudi makênkè à cikondo eci. Nènku twètù biikale makênkè à cikondo eci, kùdi Mifùndu bùngì kampànda yìdì nè cyà kuula munda mwà cikondo eci. Nènku aci ncitùtàngile twètù's!" Àlèluuyàh! "Ncitùtàngile twètù, bwà kumòna nè bwakàne bwònsò bwà Nzambì mbukùmbàjiibwe."

Kàdi bwakàne Bwèndè ncinyì? Dìyì Dyèndè!

⁹⁴ Mu ngaakwilù mukwàbò nè: "Yone, wèwè's udi mumanyè nè Mèmè ndi Nganyì. Mèmè ndi Mwakwidi Munène awu. Aci's ncilelèlà, Yone, nè Ndi nè dijinga dyà kubàtijiibwa kùdi wèwè. Kàdi bidi bìkèngela bwà twètù kukùmbaja bwakàne bwònsò. Nè ndi dijinga nè kubàtijiibwa kùdi mpindyewu, bwà kuuja Dìyì dyà Nzambì, bwalu bìkèngela bwà Dìyì dyònsò dyùlè. Nènku twètù's tudi makênkè à ditùkù, nè mbujitu butwomekela bwà kukùmbaja byònsò ebi. Nè ndi mumanyè nè bwakàne bwèbè nè dijinga dyèbè mbwà kukùmbaja Dìyì. Mbitùkùmbànyine. Twètù tudi makênkè."

⁹⁵ Bukênkè bwà cikondo nè cikondo cyònsò bùdi nè cyà kwenza cintu cìmwècìmwè aci. Tudi bamanyè cìdi nè cyà kukùmbajiibwa. Nwènù bàdi bàà nyumà nè bamanyè Dìyì dyà Nzambì, nudi numòna cìdi Nzambì mulayè. Mpindyewu Dìyì kadyèna ànu dìlwa bipeepèle to, kàdi Dìdi dìlwa ku dibandila, bìkèngela ùlwijakajè mu njila webè mu diDyènza. Kàdi, nànsha nànkù, mbilààle kutùdì, mbitùkùmbànyine bwà kukùmbaja bwakàne bwònsò bwà Nzambì. Tudi nè cyà kucyènza.

⁹⁶ Nènku mpindyewu Yesù wàkajingulula bushùwà, mu Yone nè, Yone ùvwa mupròfetà mulelèlà. Dìyì dyàkaakula bwà Yone, nè Yèyè ùvwa mumanyè kakùyì mpatà to nè yèyè ke uvwa mupròfetà wa dībà adi awu. Nènku Yone ùvwa mumanyè nè Yesù nguvwa Maasiyà awu, wa dībà adi. Nènku pashìishe bùbìdì bwàbò bàvwa bitòòke tòò nè luumvu kampàndà.

⁹⁷ Kaa, bu Èkèleeziyà wa Nzambì udi nè mwoyi mwà kupeta aci ànu mu mitù yàbò mu dìndà emu, nè mu myoyi yàbò; bwà nè Èkèleeziyà kùkadi mutàpùlùdìibwa kùdi mikàlù yà cyena màngumba to, yìdì yitàpulula mu twitabàayi nè meekala ayi,

nè bikwàbò; bwà twàfwànyinakù mwà kudisanga pàmwè mu Dìna dyà Mukalenge Yesù, katùyi nè cintu nànsha cìmwè bwà kutùlalula kule nè Dìyi dilelèlè dyà Nzambi udi nè mwoyi to; nè kupweka buludi nè mulongo wa Mifundu awu, bwà kukumbaba bwakane bwonsò bwà Nzambi bwà leelù ewu's!

⁹⁸ Bwalu, muntu kanà yònsò ewu mmumanyè nè tudi nè mwoyi mu Makènkè à dilòòlò. Mupròfeta wàkamba nè: “Nekwikalè Bukènkè ku ibaamulòòlò.” Nè pa nànkù tudi bamanyè nè tudi nè mwoyi mu dībà adi, dībà dyà Makènkè à dilòòlò. Pa nànkù, Mukalenge Nzambi àtùkwàcishèku bwà kufika ku dyumvwa cyòci aci.

⁹⁹ Twànjàayi kwalukila cyànyimà bwà katanci kakesè cyanààna, bwà kwangata bantu kampàndà bàvwà bamanyè kaaba kààbò mu ditùkù dyàbò, nè bàvwà baswè bwà kutwàla didyula anyi ní ncinyi cikwàbò cyònsò, bwà Dìyi dyà Nzambi dyùlè.

¹⁰⁰ Twàngatàayi, cileejilu, Noà nè ditùkù dyèndè. Bìvwa bikumbànyine Noà, paanyimà pàà yèyè mumanè kutuutakeena nè Nzambi nè mumanyè ndongamu wa Nzambi bwà ditùkù adi.

¹⁰¹ Mpindyewu, kwèna mwà kwenza cintu nànsha cìmwè paùdi kùyi mumanyè cyùdi wenza to. Udi nè cyà kumanya nè ndiswa dyà Nzambi. Udi nè cyà kumanya nè n'ndongamu Wendè nè dìjinga Dyèndè, nè mbikubuulwila, dībà adi kakwèna cintu nànsha cìmwè cìikalà mwà kucìmanyika to.

¹⁰² Mpindyewu, Noà ùvwa mumanyè, bwalu kàvwa mupetèle mudimu wèndè wà bwambi awu mu cìlongelu kampàndà cyà tulaasà nànsha, kàdi yèyè ùvwa mwakùle cìmònààmèèsù nè Nzambi. Nè ùvwa mumanyè nè kùvwa kùlwa mvùla kampàndà. Ùvwa mumanyè nè mvùla yìvwa mwà kupòngoloka mu maulu, byenzè bu misùlù yìkànguka, nànsha mwàkadibi bibèngangana menemene nè maalu à mamanya mu ditùkù adi. Beena maalu à mamanya, kakùyi mpatà to, bàakadyùla Noà, è kwamba nè: “Tudi mwà kukujaadikila ku maalu à mamanya nè kakwèna màyi muulu mwàmwa to.”

¹⁰³ Bwalu, bàvwa cikondo cinène musangu awu, cinène kutàmba citùdi leelù ewu eci, cyà maalu à mamanya kutàmba mutùdi leelù ewu emu. Nudi bamanyè's, Yesù wàkacitèèla nè: “Ànu mwàkadibi mu matùkù à Noà.” Mùshindù wàkiibakàbò mpingù minène yà nyama yà ntambwe nè bipaapu byà musàka, nè bintu bitùvwà katùyi mwà kulenga, kwibaka leelù ewu to. Nènku bàvwa beena maalu à mamanya banène. Bàvwa nè meekala nè bikwàbò, nè bwanga bwà kulama naabù bitàlù, mu ditùkù adi, mu mùshindù wà nè bàvwa mwà kulama mubidi mufwè ànu mwàwù nè kale. Katùvwakù mwà kucyènza leelù to nànsha byòbi bikèngela bwà twètù kucyènza. Bàvwa bayè kule kutàmba mutùdi twètù emu. Nè bàvwa mwà kujaadika nè kakùvwa màyi kuntwaku to.

¹⁰⁴ Kàdi, nànsha nànkù, bivwa bikùmbànyine Noà, paanyimà pàà yèyè mumanè kumanya ndongamu wa Nzambi, bwà yèyè kusonga bwâtù, ànu mùshindù wùmwèwùmwè awu, bwalu yèyè ùvwa mumanyè nè ng'ànu bwâtù abu bùvwà mwà kwikala cintu cìmwèpelè cìvwà mwà kulèlema. Nànsha byôbi bijaadikilbwe ku maalu à mamanya nè kakùvwà mâyi nànsha makesè muntu mwàmwa to; piikalàbi nè Dìyì dyà Nzambi dikaavwa dyambè nè mvùla neàlokè, ùvwa nè cyà kulòka.

¹⁰⁵ Nènku swâyikù ngìmanè kaaba aka bwà kwamba nùnkù, bwà babèèdì. Piikalà disaamà dyèbè dibì bikolè mu mùshindù wà nè pàmwàpa ngàngàbukà mwàmbè nè kakwèna ditekemena to; bìdì bishintulula cinyì, pàdìbì ànu nè Nzambi ùdì ùkwambila nè: “Nèngìkalè mwà kukushiya nè mwoyi”?

¹⁰⁶ Bwà cinyì bùdì... Ngàngàbukà anyì mwena maalu à mamanya kampànda mmufwànyine kwamba nè: “Ntèndeleele webè ùdì wamba awu, Nyumà Mwimpè, nè dyakula dyèbè dyà mu myakulu adi, nè dyèbè—nè dyèbè dileeja patòòke edi, bìdì ànu byejejeji byà mu mutù.” Nè: “Kwèna mùle tètè nè Nyumà Mwimpè to.” Nè: “Cintu bu nànkù kacitukù to.” Nè binunu byàbùngì byà balombodi bàà ntèndeleele badi bàmba cyòci aci leelù ewu, nè: “Wèwè udi ànu musalùke cyanààna.” Nè: “Cintu bu nànkù kacitukù to.”

¹⁰⁷ Nènku bìdì nè, bàmwè bàà kùdìbo bàkaadi bangambile nè: “Bwà cinyì kwènakù mwà kudìvwija wa mu dīgumba kampànda dīmpè, kàdi kukwàta mudimu nè bwenzeji bwèbè bwà kutancisha dīgumba adi?”

¹⁰⁸ Ki pashìishe kwambayè nè: “Mpindyewu, musùmbà wà beena mpenta ùdì ujīmija naawù dībà ewu, bàdì ànu musùmbà wà batèndeledi bàà mafi. Nè bàdì—badi... Cintu bu nànkù kacitukù to. Mbasalùke ànu mu byeledi byàbò byà meeji abi. Kabèèna—kabèèna—kabèèna nè cidìbo bàmba aci to. Tudi mwà kujaadika nè kabèèna naaci to.”

¹⁰⁹ Kaa, mwanèètù, udi mu lujòòkò lwà menemene. Tudi bamanyè citùdì naaci's! Tudi balediibwe cyàkàbìdì, ku Nyumà Mwimpè, nè tudì tumòna byenzedi Byèndè munkaci mwètù mene, ànu mwàkadìbì mu cikondo cyà Bible amu. Wèwè witabuuja Nyumà Mwimpè umwèumwè awu, dībà adi bwà cinyì Yèyè kèna wènzà cintu cìmwècìmwè aci mu èkèleeziyà webè? Bwalu, Yèyè kèna mwà kushintuluka to; Yèyè's ùdì Nzambi.

¹¹⁰ Pa nànkù, nànsha bijaadiki byà maalu à mamanya biikàle cinyì, byà nè tudì “ànu basalùke,” nè tudì “ànu basalùke mu byeledi byà meeji,” nè kakwèna “bulelèlè cintu nànsha cìmwè mu ntèndeleele munène” wetù ewu to, nè “kì—kì ncidiye ànu nè cyà kwikala to,” nè bikwàbò byà mùshindù awu, nè twètù tudì “ànu musùmbà wa badyombòdìibwè,” kanùcitàbùùjiku to! Kanùcitàbùùjiku to!

¹¹¹ Byôbì byenzêke nè mwanèèbè wa bakàjì àfuminè mu kàlaasà, wamba nè: “Maman, twajaadiki, leelù ewu nè, ka—kabalùbalù kàà mutù wà muntu kàdi ànu kafwànàngàne nè kàà nsòkòmutù, nwamònu’s.” Anyì nè: “Tudi—tudi balongè nè—nè tudi bamanyè nè twètù bònsò tudi bafùmine ku kabùlù kàà mashi kàmwèpelè, nè tudi ànu nyama yètù eyi.” Kanwìtabuujiikù nànkù to!

¹¹² Nènku cìdì ní nganyì ní nganyì wamba nànsha ciikàle cinyì, mwena tèòlòjì kanà yònsò ewu, ngàngàbukà kanà yònsò ewu, mwena maalù à mamanya kanà yònsò ewu, mulongeshi kanà yònsò ewu; shààla wèwè mukwàte ku Dìyì dyà Nzambi! Bwalu, nwàvùlukaayi nè, tudi munkaci mwà kwibaka, bu mùvwà, Noà mu ditùkù dyèndè, tudi munkaci mwà kwibaka Bwàtù.

¹¹³ Nè Noà ùvwa mumanye nè yèyè kàyì mujikije bwàtù abu, nè kì ng’ànù bàà mu nzùbu mwèndè nkààyabò bàvwà mwà kusùngidiibwa to. Pa nànkù, yèyè ùvwa mumanyè ndongamu wa Nzambi. Munkaci mwà didyula, kabyàkamutàcishakù nànsha kakesè to. Wàkatùungunuka ànu nè kutuuta nsandu pa bwàtù abu.

¹¹⁴ Pa nànkù, nànsha bôbò bàmba bìshi nè: “Cintu pààcì nè ndibàtiiza dyà Nyumà Mwîmpè kacitukù to. Cintu pààcì nè ndyondopa dyà kùdì Nzambi kacitukù to.” Mbilàale kutùdì, mbitùkumbànyine, bwà twètù kukumbaja bwakane bwònsò, bwà twètù kwimana mu dîbà dyà diteeta edi, nè kutùungunuka nè kutuuta nsandu ku Bwàtù bwà Mukalenge!

¹¹⁵ Bàdì bàmba nè: “Mwanèètù, udi mu cibwejàkàjì mu mabàtiiza èbè, nè bikwàbò. Kùdì... Kabìvwa bikèngela bwà wèwè kubàtijiibwa mu Dìnà dyà Mukalenge Yesù to.”

¹¹⁶ Mwà nyiikilangana nè babàka bàbìdì balenga makèèlèlè dilòòlò awu. Nènku kùdì nsongààlùmè udi ufùma ku dibàtijiibwa, nè wìtabuuja nè kùdì Nzambi ànu umwèpelè. Nènku mu disangisha dyà Beena Kantu-ku-byanza kabààkumulekelakù ùfila bujaadiki to, bwalu kàtu wìtabuuja nè kùdì Nzambi yisàtù to.

¹¹⁷ Mpindyewu, cìdìbò bàmba nànsha ciikàle cinyì, mbilàale kutùdì, mbitùkumbànyine, bwà twètù kukumbaja bwakane bwònsò. Dìyì nedishaalè òmwèdimwè adi pàdì bisùmbù byà Beena Kantu-ku-byanza nè bònsò bayè, nè èkèleeziyà kayàkwikalakù kàbìdì to. Dìyì dyà Nzambi nedishàale kashidi ànu òmwèdimwè adi! Mbitùkumbànyine bwà kukumbaja bwakane bwònsò.

¹¹⁸ Bapròfètà kabàtukù bambè cipròfètà cyà ditùkù edi anyì? Vùlukaayi nè, badyùdì abu, mbibàkumbànyine bwà kukumbaja aci, pààcì, bwalu cìdì nè cyà kukumbajiibwa, pààcì.

¹¹⁹ Kàdi, Noà, kacyàkamutàcisha to, wàkaya ànu kumpalà bwalu ùvwa mumanyè ndongamu wa Nzambi. Yèyè ùvwa mumanyè cìvwà Nzambi mwà kwenza, Mwanèètù Kidd.

Ùvwa mumanyè ndongamu wa Nzambi bwalu ùvwa muiikile nè Nzambi, nè bìvwa bilondèshile Dìyì dyà Nzambi, kàdi kutùngunukayè nè kucyènza, nànsha bìshi. Nànsha maalu à mamanya mwà kucijaadika anyì ní ncinyì cikwàbò cyònsò, anyì mùshindù kaayì wùvwà didyùla ditèèkiibwe pa Noà, yèyè wàkashààla ànu nè Dìyì dyà Nzambi, nè kutùngunuka ànu nè dituuta nsandu. Bwà cinyì? Cìvwa cìmukùmbànyine, bwalu Noà ùvwa mupròfetà. Nènku bìvwa bimukùmbànyine bwà kulamayè Dìyì dyà Nzambi. Yèyè wàkashààla naaDì.

¹²⁰ Mbikùmbànyine mupròfetà kanà yònsò ewu, mupròfetà mulelèlè wa Nzambi, bwà yèyè kushààla nè Dìyì. Cìdì maalu à mamanya mwà kwamba nànsha ciikàle cinyì, nè cìdì *cikampàndà* mwà kujaadika *cikansanga*, anyì bikwàbò, cìdì—cìdì—cìdì cìkùmbanyina bwà nè cìkùmbajè bwakàne bwònsò.

¹²¹ [Mwanèètù Branham ùdi ùbala kabèjì mu cinyànyà—Muf.] Ëyo. Mbantùmìne mukenji bwà kusambidila maman dyàkàmwè. “Musàmbidile mpindyewu. Ngàngàbukà nyèwù ùfùma ku dipàtuka.” Ëyo.

¹²² Mpindyewu, Mukalenge Yesù, mmèmè ewu mwimàne kaaba aka. Awu’s maamù wanyì. Pìikalàye munkaci mwà kuya, ndi ndàmbula musùukà wèndè mu byanza byà Nzambi. Kàdi Mukenji ngwèwù wùdì nè cyà kutùngunuka, Mukalenge. Kùdi bàdì nè mwoyi kaaba aka bàdì nè cyà—bàdì nè cyà kufwà. Ngambùlwishèku, Mukalenge. Mèmè ndi Webè. Mu Dinà dyà Yesù.

¹²³ Mbitùkùmbànyine’s! Mbinkùmbànyine mèmè mpindyewu bwà kukùmbaja bwakàne bwònsò. Dìyì dyà Nzambi dìdì dila dyàmbedi! Kakwèna dinanga bu dinanga dyà Nzambi to!

¹²⁴ Mpindyewu, Noà, nànsha didyula kaayì òvwà pa taatù Noà adi, ùvwa mumanyè mwaba wùvwayè mwimànyine, nènku ke yèyè kushààla ànu nè Dìyì. Nè yèyè wàkiibaka bwàtù bwà disùngidiibwa dyà bàà mu nzùbù mwèndè, bwalu bìvwa bimukùmbànyine bwà kwenzayè nànkù. Bìvwa bikùmbànyine Noà, bwà—bwà kwenzayè nànkù.

¹²⁵ Mbikùmbànyine bwà mwena Kilistò yònsò kutwàye ku cyà Dìyì. Cyà bushùwà menemene. Kwimana ku luseke lwà Dìyì dyà Nzambi! Maulu nè buloba nebiipitè, nèupitè, mèmè nèmpitè, èkèleeziyà neyipitè, malongolodi neapitè. Kàdi Dìyì dyà Nzambi kadyàkujìminakù to! Ikàlà nè lulamatu, mwena lwendu wa lulamatu!

¹²⁶ Mu matùkù à Henòkà, ànu kumpàlà menemene kwà dipaasalala dyà màyi adi, pààkatàngila Henòkà mwaba awu nè kumònayè Noà wibaka bwàtù abu. Henòkà ùvwa mupròfetà. Henòkà ùvwa mumanyè nè yèyè ùvwa cifwànyikijilu. Nè yèyè ùvwa mumanyè nè, kumpàlà kwà mvùla ayi kulwayi, bìvwa bikèngela bwà kufilayè cileejilu, ki mu mapingaja kampàndà byàkamukùmbanyina bwà kwenzayè lwendu.

Bivwa bikumbànyine bwà yéyè kwenza lwendu elu nè Nzambi. Nènkù, mu mûshindù kampàndà, ditùkù adi yéyè kushintulula kajila kèndè. Pamutù pàà kwenda kunyùngùlukila ku luseke lwà kakùnà, yéyè wàkangata Cibeeba cyà Mfùmù, nè kutùngunukayè ànu nè kwenda kuya. “Kàdi kabààkamusangana to, bwalu kàvwakù to,” kàdi ùvwa wènda ùbànda nè Cibeeba cyà Mfùmù!

127 Éyi Nzambi, lekèlè ngiikalè bu Henòkà's! Pàdi díbà dílwa dindì nè cyà kudítwa mu njila, lekèlè mpetèku Cibeeba cyà Mfùmù!

128 Ndi mwà kumòna Henòkà. Mùvwàye mumanyè nè bivwa bimukumbànyine, bwalu yéyè ùvwa mupròfetà, nè ùvwa mumanyè cívwa nè cyà kwenzeka. Pa nànkù, ndi mwà kumumòna ùtwa mukàjèndè mishikù yà dimulaya naayi, wamba nè: “Munanga wanyi, nènku mònè pashiishe.” Kwangata bàna bèndè, nè kubàtwa mishikù yà dibàlaya; nè kupweka too nè kwà mwanèndè wa balùme ukààvwa musèle nè mwanèndè wa bakàji ukààvwa musèdiibwe, nè kubàtwa mishikù yà dibàlaya.

129 Bòbò nè: “Kúyaaya nkwepi, taatù? Udi upàtuka bwà lwendu lukesè anyi?”

“Éyowà, nyàaya bwà dyendakana.”

130 Kàdi yéyè kàakangatakù kajila kàà kale, kàà ciibidilu aku ditùkù adi to. Wàkangata Cibeeba cyà Mfùmù, nè kuyayè too nè mu Butumbi. Bivwa bimukumbànyine bwà yéyè kwenza nànkù. Yéyè kàvwa muswè kuumuka to, kàdi nànsha nànkù bivwa bimukumbànyine bwà yéyè kukumbaja bwakàne bwonsò. Bwalu, yéyè ùvwa cifwànyikijilu cyà Èkèleeziyà leelù ewu. Yéyè ùvwa cifwànyikijilu cyà Èkèleeziyà wikala nè cyà kwenza lwendu lwà mu mapingaja, dimwè dyà ku mapingaja aa. Netùbande nè Cibeeba cyà Mfùmù, nè ki twètù bàyaaya bàba's!

131 Éyowà, bivwa bikumbànyine Noà, bivwa bikumbànyine Henòkà, bwà bàkumbajè bwakàne bwonsò.

132 Pashiishe ndi muswè kwakula bwà muntu mukwàbò kaaba aka. Kùvwa muntu dyèndè Danyèlè. Nè yéyè ùvwa nè mwoyi mu ditùkù dyà badyudi. Nudi bamanyè's, bàna bàà Izàlèlèlè bàvwa buumùshìibwe mu buloba bwàbò, bayè mu Baabulòònà, nè mwómò amu bàvwa babungàme, nènku munda mwà bidimu bitwè ku makùmi mwandamutekète bàvwa kuntwaku. Kàdi kùvwa mupròfetà wa citende wàkapweka pàmwè naabò kuntwaku, dìnà dyèndè Danyèlè.

133 Nènku yéyè nè kasumbù kakesè, ànu dyanza dikesè dyà bàna bèètù, bàvwa badisange nè badicipe kùdi Nzambi, bwà nè kabàvwa mwà kudìkooyisha nè—nè mmwènenu wa cyena leelù wa ditùkù adi nànsha. Kabàvwa mwà kucimbakana nè minyiiniyà yà mfùmù to. Kabàvwa mwà kunwà maalà èndè makolè awu to. Kabàvwa nè cyà kubwela mu mafetè èndè awu to. Kàdi bàvwa

mwà kudilama bàà cijila nè kudilàmbula kùdi Nzambì, bwalu aci cìvwa cibàkùmbànyine!

¹³⁴ Bìvwa bikùmbànyine Danyèlè, bwalu yêyè ùvwa mupròfetà, bwà kushààlayè nè Dìyì.

¹³⁵ Mupròfetà mulelela kanà yònsò udi mumanyè Dìyì dyà Nzambì, udi. . . Yêyè kàyi mumanyè Dìyì dyà Nzambì to, dîbà adi kí mmupròfetà mulelèlè to. Mupròfetà mulelèlè ùdi ùshààla nè Dìyì. Cyònsò cìdì Dìyì dyàmba aci, ùdi ùshààla ànu naaDì. Cìdì mmwènenù wa ditùkù edi nànsa ciikàle cinyì, anyì cìdì èkèleeziyà wa—wa cyena leelù wàmba nànsa ciikàle cinyì, anyì cìdì muntu kampàndà mukwàbò wàmba, anyì muntu mukwàbò wenza cintu kampàndà cikwàbò, mupròfetà mulelèlè ùdi ùshààla ànu nè Dìyì.

¹³⁶ Nènkù Danyèlè ùvwa mumanyè nè, bu yêyè mwà kushààla nè Dìyì, cìvwàci mwà kumulòmba's. Necìmujiimijijè dimanyika dyèndè adi. Cìvwa nè cyà kumulòmba bwobùmwè bwèndè nè bàna bààbò bakwàbò abu. Cìvwa nè cyà kumupangisha bintu byàbùngì. Kàdi bààkapàtula bwalu kampàndà, nè, bàvwa nè cyà kusambila kaanzambì kampàndà, pashìishe paanyimà pàa aci bàvwa mwà kwalukila nè kusambila nzambì kanà yònsò ewu.

¹³⁷ Kàdi nudi bamanyè's, kùdi cintu kampàndà pa Cyôci aci, Nzambì, twètù katwèna tudyà cibanga kumpàlè kwà Nzambì to. Kakwèna byà didyà dyà cibàn- . . . kudyà cibàngà to, nè Nzambì. Nzambì ùdi ùshààla ànu Nzambì! Yêyè kèna ùtèkemenakù bwà twètù kwikala beena Kilistò, kuMutùmbisha nè kuMukuukwila, mu dyàlumingù; kàdi, mu òmwè, tushààla batulùmùkè nè tubilekela, nè meeji à mishindù yònsò to, twamba nè: "Pàmwàpa mvwa mutùpàkàne, nè bìvwa bikèngela mèmè kwikala mwenzè *cikampàndà* anyì *cikansanga*." Tudi tushààla kacya twèla miji pa Dìyì dyà Nzambì, nè tudyàdijaPù!

¹³⁸ Pa nànkù tudi tusangana nè, Danyèlè, bìvwa bimukùmbànyine, yêyè bu mupròfetà, bwà kushààla nè Dìyì, nànsa byà munyi! Pa nànkù kwàkapatuka dìyì ditùmà dyà mfùmù, dyàmba nè: "Nè ewu yònsò wàkuukwila nzambì mukwàbò kanà yònsò ewu, pa kuumusha nzambì uvwàbò basòbole awu." Mu ngaakwìlù mukwàbò nè: "Wèwè kùyi mwelàngàna neetù dibòko to, netùkukùpè ànu mu bwìnà bwà ntambwe." Èè, bìvwa bikùmbànyine Danyèlè, bìvwa bimukùmbànyine bwà kukùmbaja bwakàne bwònsò, bwà yêyè kàkuukwidikù nzambì mukwàbò to, anyì kudivwàndakaja mu maalu à pa buloba; ànu kùdi Nzambì nkààyèndè! Pa nànkù, kukàngulayè tùulè nè kubandisha madidiishi, nè kukàngulayè rìdò, nè kutàngila lwà ku Esètè, kàdi kusambila misangu yisàtù ku ditùkù, ànu mwàkenzenzàye misangu yònsò amu. Bwà cinyì? Kì nkudifinda mu mwaba kampàndà nè kusokoma, bwà kucyènzà nànsa, kàdi wàkakàngula màdidiishi; kulekela

muntu kanà yònsò ùmòna, udi muswè kumòna awu. Yèyè kàvwa nè bundù bwà ntèndeelèlu wèndè to.

¹³⁹ Bwalu, mbikumbànyine mwena Kilistò bwà kubènga kwikala nè bundù bwà ntèndeelèlu webè awu. Bu mwàkambà Pòlò, wa kale awu nè: “Mu njila udibò bàbìikila nè ndipàmbuka, bupàle awu, ke mùshindù wùndì nkuukwila Nzambì wa baataatù bèètù awu.” Nwamònu anyi? “Ncyèna nè bundù bwà Èvànjeeliyò wa Yesù Kilistò to,” mwàkambàye, “bwalu ùdi Bukolè bwà Nzambì bwà lupàndu, kùdì muntu yònsò udi uMwitabuuja.” Ncyà bushùwà, kàyì nè bundù bwà Èvànjeeliyò to! Ncintu cidì cishààla cikwàte mu mèbà àdì màzuwà àtènakana nè mùtootò wònsò wùjìmina kwìsù, nè ngondo nè mìtootò, nè bipeepèlè bikolè bituuta. Yèyè ùcidì ànu kacya mukwàte, bwalu ng’Èvànjeeliyò wa Yesù Kilistò!

Danyèlè ùvwa nè lulamatu. Bìvwa bilààle kùdiye.

¹⁴⁰ Bàna bàà beena Ebèlù abu, bìvwa bilààle kùdìbo, bibàkumbànyine, paanyimà pàà bamanè kwangata ngiimànyinu wabò bwà Nzambì. Bìvwa bibàkumbànyine’s. Kabàakacyùka bwà cikùtù cyà kapyà to. Mu mateeciibwa makolè, cyàkacyùkàbo ncinyi’s? Bakààvwa bamanè kwangata ngiimànyinu!

¹⁴¹ Éyì Nzambì wa yààyà, bu beena Kilistò bàà leelù aba mwà kumònakù aci’s wè! “Nèndondè njila pàmwè nè banyààbanyà badyombola bàà Mukalenge. Ndi mubangè nè Yesù, Éyì Mukalenge, ndombòlèku too nè ku ndekeelu.” Mu diteeciibwa, ntàtu, masamà à mwoyi, lufù, mabèèdì, kanyinganyinga, nèntungunukè ànu nè kwangata luseke lwà Yesù Kilistò, bwà kwangata kàanyì kaaba! “Pa Kilistò, Lubwebwe lushindàme, mpàndì mwimàne, myaba mikwàbò yònsò nduntekà.” Bikwàbò byònsò bìdi luntekà. Makalenge neàponè, nè matùnga neàvingutukè, nè màngumba neàtangalakè, nè beena tèòlòjì nebàfwe, kàdì Dìyì dyà Nzambì, nedishààle ànu òmwèdìmwè adi!

¹⁴² Èyowà, s’bìvwa bibàkumbànyine bwà kwangatabò ngiimànyinu wabò. Nènkù bìvwa bibàkumbànyine, paanyimà pàà bamanè kwangata ngiimànyinu, bwà kushààlabò pa ngiimànyinu wabò awu.

¹⁴³ Paùdì ulwa mu dindà emu, mwikàle witabuuja nè Nzambì neàkwondòpè, nè wangata ngiimànyinu webè, mbikukumbànyine bwà nè kwènakù kashidi mwà kufila bujaadiki bùbèngangana nè aci to; kabiyi nànkù, kùlù to. Ncyà bushùwà. Wèwè kùyì udyùmvwa nè Nzambì mmufwànyine kukwondopa to, dībā adi shààla kule, udi ànu munkaci mwà kucìseka cyaanàna.

¹⁴⁴ Wèwè udyùmvwa, mu dindà emu pààlwà dibìikila dyà ku cyoshelu, nè: “Ndi muswè kwangata ngiimànyinu wanyì bwà Kilistò.” Wèwè udyùmvwa nànkù, balà mushinga awu; balà

bantu bèèbè, ùmonè ní udi mukùmbàne mwà kuya ku mvità. Ùmonè ní udi mudilongòlòle. Wèwè kùyi udyùmvwa bu nè udi mudilongòlòle to, kùlù to. Kàdi Cintu kampàndà cyòcì cìkwambila nè: “Edi nditùkù dyànyì, edi ndyànyì dindà,” dībà adi neùlwe nè neùshaalèmu! Kuntentemukikù to nànsha kakesè, nànsha lufù lukùngàmàngàne neebè, nè dibungì dikujìngìle kwìsù. Cyùdì utàcishila meeji ncinyì? Imana mwaba awu! Bwalu: “Maulu nè buloba nebìjìmine; Méyì Àànyì kaàdyàkupangilaku to!” Neùshaalè naaDì.

¹⁴⁵ Paùdì wamba nè: “Ndi ngìtabuuja Yesù Kilistò bu Mwondopi wanyì. Ndi ngìtabuuja, mu dindà emu nè, Yèyè neòndopè mubidi wànyì ùdì ùsaama ewu. Cintu kampàndà ncingambile bwà kulwa mu èkèleeziyà. Ndi mwab’ewu munkacì mwà beena kwitabuuja. Ndi ngàngata ngiimànyinu wanyì, mu dindà emu. Ndi nCìitabuuja! Nèmbandè bwà kunsambidilabò. Pànsambidilàbo, nènsaalè mwimanyìne pa kaaba aku! Nànsha mìdimà milwè bishi, anyì ní yìdì penyì, mèmè nèngiimanè ànu pa kaaba aku.” Wèwè udi mwangàte kaaba bwalu bìvwa bikukùmbànyìne.

¹⁴⁶ Paanyimà pàà wèwè mumanè ànu kwenza ditonda, udi nè cyà kushààla nè ditonda dyèbè adi. Ncyà bushùwà. Mbikukùmbànyìne, wèwè bu mwena Kilistò, bu mwena kwitabuuja, bwà kushààla nè ditwishibwa dyèbè.

¹⁴⁷ Kùlekedikù dyabùlù ùkusàkila *eku* nè *kwàka* to. Wèwè utu misangu yònsò ànu mu cibwejàkàjì. Udi misangu yònsò ànu mupàtùke mu njila munène. Wèwè utu misangu yònsò ànu ubwela nè upàtuka. Nènku’s ke mùshindù awu wùdì kùyi mwà kushààla mwaba nànsha wùmwè to. Kwèna mwà kudyèyemena wèwè mwìnè to. Anyì, kwèna mwà kucyènza to, muntù nànsha umwe kèna mwà kwikala nè dyeyemena mu wèwè to. Bikèngela wìmanè! Nènku paùdì mwenzè cyònsò cyùdì mwà kwenza bwà wèwè kwimana, dībà adi imànà’s! Tùngunuka wèwè ànu nè kushààla mwimàne’s! Ncyà bushùwà. Tudi nè cyà kwenza nànkù. Mbitùkùmbànyìne. Mbilààle kutùdì, bwà twètù kucyènza.

¹⁴⁸ Bìvwa bilààle kùdì Eliyà, bikùmbànyìne Eliyà mupròfetà awu, bwà kwangatayè ngiimànyinu wendè awu bwà kukùmbaja Díyì dyà Nzambì, bwalu ùvwa mumanyè Díyì dyà Nzambì. Nè yèyè ùvwa mumanyè nè mwèpiskòpò mutàmbidile ewu, Izàbèlà, nè tulumbùlumbù twàbò twònsò twà cyena-màngumba atu tusambàkànàngàne nè nkwaaka wa bàà pa buloba. Bìvwa bikùmbànyìne Eliyà, bu mupròfetà, ke yèyè kwimana. Nènku yèyè kwimana nkààyendè! Kwambilayè Nzambì nè: “Bònsò mbayè, pa kuumusha mèmè, nènku’s mèmè ewu mwimàne nkààyanyì.” Aci’s nku dyèndè dimanya pèndè. Nzambì kwambaYè nè Ùvwa nè ndambù mukwàbò uvwa mwangate ngiimanyinu umwèumwè awu; pànwàpa kacìyi mu mwaba wùvwà—wùvwà Eliyà ùsanganyiibwa awu

to, bwalu yêyê nguvwa ditunga dijimà diludikila ndudì. Kabààkapeta didyula bu mwàkadipetaye to, bwalu bônso bàvwa bàmwamba mambàvi, bwalu yêyê ùvwa mupròfetà. Kàdi bìvwa bimukùmbànyine, munkaci mwà diteeta, munkaci mwà didyùdiibwa, munkaci mwà dibenga kucyùka dyà maalu; byàkakùmbànyina Eliyà, bu mupròfetà, bwà kwangata ngiimànyinu bwà Nzambi, nè kwimana mwaba awu.

¹⁴⁹ Mbitùkùmbànyine bwà kukùmbaja bwakàne bwònsò. Bantu banène, bàà bukolè, biikàle bàdyanjila kuleeja mu mundidimbì ditùkù edi pàdi ntèndeleeleu yà Izàbèlè nè bikwàbò bìjuuka mpindyewu, bintu bitùdi naabi leelù ewu, biteeta bwà kucimuna's. Mbikùmbànyine musadidi wa Nzambi, cidì muntu kanà yònsò ewu wàmba anyi cidì cyènzekà nànsha ciikàle cinyi, bwà kwimanayè, bwalu mbitùkùmbànyine bwà kushààla nè Dìyì.

¹⁵⁰ Eliyà ùvwa mumanyè nè yêyê ùvwa mupròfetà. Ùvwa ùmòna bikèènà-kumòna. Nzambi ùkaavwa mumushindike nè mmupròfetà. Pa nànkù nànsha bu bàna bààbò. . . Kùvwa binunu makùmi; tângilàayi ànu beena Izàlèlèlè, miliyò yààbò, bantu bàvwa bàlaka mukana bàmba mùvwàbo biitàbùuje Yèhowàh abu, bàvwa—bàvwa badìvwijè bulongolodi. Bàvwa bashààle bàà cyena leelù, ànu mùdibo leelù ewu emu. Bàakashààla bàà cyena leelù. Bàakadyà cibàngà pa Dìyì Dyèndè. Àlèluuyàh, kàdi byàkamukùmbanyina, Eliyà awu, bwà yêyê kukùmbaja bwakàne bwònsò. Ki yêyê kwimana mwaba awu, nkààyèndè, ùtonokela bubi! Bu bôbò bamushipè, bìvwa byènza cinyi's? Bìvwa bimukùmbanyina, bwà kukùmbaja bwakàne bwònsò. Kùvwa bubi mu ditunga amu. Kùvwa dibenga kucyùka dyà maalu mu ditunga amu. Kùvwa bilema byà mu Mifundu mu ditunga amu. Nènku byàkakùmbanyina, Eliyà, bwà kukùmbaja bwakàne bwònsò, bwà kutwà ku cyà Yèhowàh; dîbà adi Yèhowàh kutwà ku cyà Eliyà. Amen. Bimukùmbànyine's!

¹⁵¹ Abraham. Bìvwa bikùmbànyine Abraham bwà kutàpulukayè nè bupidyà. Mbikùmbànyine mwena kwitabuuja kanà yònsò ewu bwà kutàpulukayè nè bupidyà! Abraham, bìvwa bimukùmbànyine bwà kwendela mu buloba bwèndè sungasunga, yêyê nè Nzambi, nkààyèndè, bwalu ùvwa mupròfetà. Bàà pa buloba kabààkumvwa bwà cinyi Abraham wàkenza disungula dyà bu nànkù to. Bwà cinyi wàkashiya dikù dyèndè? Bwà cinyi wàkashiya èkéleeziyà wèndè? Bwà cinyi wàkashiya cisàmbà cyèndè? Bwà cinyi yêyê wàkenza cintu cyà macimbu bu nànkù, bwà kusòmbela mu buloba bwenyi mùdì kamùyì mâyì anyi cyàkudyà to? Bwà cinyi wàkaya mu bipèèlè byà munda mutupù mùvwà bantu kabàyi bânji kuya to? Kàdi bìvwa bimukùmbànyine, bwalu yêyê ùvwa mupròfetà, bwà kuditàpulula nè bupidyà bwònsò, nè bwà kwenda nkààyèndè nè Nzambi. Nzambi kwamba nè: "Tàpulukà, nènku Mémè nènku bènèshè."

¹⁵² Paùdi utàpuluka nè bupidyà bwònsò, Nzambi nèakubènèshè. Nènku mbikùmbànyine yònsò wa kutùdi, nànsha byòbì bilòmba cinyi, bwà twètù kuditàpulula nè bàà pa buloba beena bupidyà. “Pàtukàayi munkaci mwàbò, nè tàpulùkàayi,” mùdi Nzambi wàmba, “Mèmè nènwnàkidilè.” Mbitùkùmbànyine, bu balùme nè bakàji bàà Nzambi, bwà kwangata kaaba kèètù mu dîbà dyà mîdimà ditùdi nè mwoyi edi.

¹⁵³ Abraham, kàyi utàngila cìvwà bakwàbò abu bèèla meeji to, wàkaditàpulula. Bwà cinyi? Yèyè ùkaavwa mumòne Nzambi. Wàkamòna cìkèèna-kumòna. Cìkèèna-kumòna aci cìvwa cilelèlè, cìkèèna-kumòna aci kwenzeka. Ùvwa mumanyè nè Nzambi ùvwa nendè; Abraham, bwà kwamba dîyi dyà dipapulangana bu mwàkenzàye amu. Muntu wa bidimu lukàmà, nè mukàji wa bidimu makùmi citèèmà, nè mukàji ùvwa nkumba nè mulùme kàvwa mwà kulela to, nènku bàvwa nè cyà kupeta mwànà wa mu dibòko nè bidimu bìvwàbò naabì abi's. Mòna's, maalù à mamanya à baamingàngàngà à ditùkù adi àvwa mwà kwikala mamubikile nè muntu kampàndà muumishi wa maalù. Bàvwa mwà kwikala bamubikile nè “mupàlè.” Kàdi bìvwa bikùmbànyine. Àlèluuyàh!

¹⁵⁴ Míngà misangu mbikùmbànyine bwà kulwa buumishi bàà maalù, pìikalàbì bilondèshìle Dîyi.

Nzambi ùkaavwa mwakùle nendè, mwambè nè: “Abraham.”

Yèyè nè: “Èyowà's, Mukalenge?”

¹⁵⁵ “Mèmè ndi Nzambi wa baatatwènù. Mèmè ndi Nzambi wa Cyendèlèlè. Mèmè ndi El-Shaddai; Mèmè ndi Cyàdi, Mèmè ndi Dibèèle, Mèmè ndi Mufidi wa Dikàndà. Búngi bwà bidimu byèbè, Abraham, bùdi bùNgambila cinyi? Mùshindù wùdi nkumba anyi mùshindù wùdi difù dyèndè kadiyi mwà kwimita, Mèmè nènкупèèshe mwànà wa balùme.”

Ke Abraham kwambayè nè: “Ndi nKwitabuuja, Nzambi.” Àlèluuyàh!

¹⁵⁶ Bible mmwàmbè nè: “Yèyè kààkatènkakanakù ku mulayi wà Nzambi, ku bupidyà to, kàdi ùvwa nè dikàndà, ùfla butumbi kùdi Nzambi.” Bwà cinyi? Bìvwa bimukùmbànyine. Ùkaavwa mumòne cyanza cyà Nzambi cikwàta mudimu, mu bukolè.

¹⁵⁷ Kaa, Branham Tabernacle, mmwàkù wa mùshindù kaayi wutwàfilà mu Ditùkù dyà Cilumbulwidi? Pààbì's, tudi bamòne cyanza Cyèndè cyà bukolè. Tudi bamòne Bukolè Bwèndè. Tudi bakenkète Butumbi Bwèndè. Tudi bamòne cyàkambàYe; kaCitu cìpangila nànsha. Tudi bamòne Mupèrsonà Wèndè, Dikunji dyà Kapyà dinène, Bukènkè bulembelèle mu cibambalu emu. Tukàadi baCimòne kuntu kwàka, maalù à mamanya mmaCikwàte fòtò, nè bikwàbò byònsò. Nè bùmvwè Mukenji wùpàtuka, ànu buludi mu mulongo nè: “Tàpulukà naabò! Kùswikakanyikù nè cintu nànsha cimwè cyà bupidyà to!” Mbitùkùmbànyine, bwà twètù kukùmbaja bwakàne bwònsò.

158 Abraham wàkajikula nè ùvwa mwena lwendu nè mwenyi. Kàvwa nè cyà dyenza to; kàvwa mumanyè muntu nànsha umwe pa buloba to. Yèyè wàkenda nè Nzambi, bwalu bìvwa bimùkumbànyine, bwalu yèyè ùkaavwa muMumòne. Bìvwa bikumbànyine Abraham. Pàakatwilanganà bamfùmù bônso abu kuntwaku, nudi bamanyè's, bwà kumuvwija muntu kampàndà munène menemene; bamfùmù bônso, paanyimà pàà Abraham mumane kupeta bucimunyi bunène ebu, pàakatwilanganà nendè bamfùmù kuntwaku, bânà bèètù bônso bàà cyena-màngumba abu, kwambabò nè: "Udi mumanyè's, Abraham, twètù—twètù netwènzè neebè cipungidi. Netwènzè *cikampàndà*."

159 Yèyè nè: "Ncyàkwangatakù nànsha nshiga wa bisàbaatà to, bwànyì mèmè; bwà kùlu kwamba nè: 'Ndi muvwijè Abraham cintu kampàndà nànsha.'"

160 Kaa, bìvwa bimùkumbànyine, bwalu ùvwa mumanyè (Àlèluuyàh) nè Nzambi wàkadicipa kùdiye nè: "Nènkupèeshè myaba yônso yùdi utàngila ayi: ku esètè, ku nord, ku wesètè, anyì ku sud."

161 Bidi bìshintulula cinyì nànsha twètù biikàle nè dyeyà anyì nè kamàndà, nànsha twètù nè cintu kampàndà cyà kudyà anyì katùyì naaci to, nànsha twètù nè mwoyi anyì tupùnga nè lufù? Nzambi wàkalaya nè: "Bapòle nebàpyanè buloba." Mbilàale kutùdi, mbitùkumbànyine, bwà twètù kwikala nè nsòmbelu wa mshindù awu, kwenza maalu mshindù awu, tudi nè cyà kukumbaja bwakàne bwônso. Nzambi mmuswè bwà balùme nè bakàji biikalà mwà kwimana nè kukumbaja bwakàne bwônso! Mu bushùwà bwà bwalu, *bwakàne* bùdi "Diyì Dyèndè."

162 Ànu mûngămbi ku ntwàdijilu wa diyishi nè, ke bwà cinyì Yesù wàkabàtijiibwa. Nànsha byòbì nè bìvwa bìshi... Yèyè mwàmbè nè m'Mwànà wa Nzambi, díbà adi ùbàtijiibwa, bwà dilekelediibwa dyà mpèkaatù? Yèyè kàvwa nè mpèkaatù nànsha umwe to. Kàdi byàkakèngela bwà kusukudiibwaYè, bwalu Yèyè ùvwa Mwakwidi Munène. Byàkakèngela bwà kukumbajaYè bwakàne bwônso. Yèyè nè: "Citwàle, Yone. Ndi mumanyè nè wèwè udi mucimanyè. Ndi mumanyè nè ndi mucimanyè. Nè tudi bamanyàngàne muntu nè mukwèndè. Kàdi netwitabè bwà biikalè nànkù, kàdi's mbitùkumbànyine's." Amen! Àlèluuyàh!

163 Pashiishe nèndondè njila pàmwè nè banyààbanyà badyombola bàà Mukalenge! Mbinkumbànyine, mbikukumbànyine, bu basadidi bàà Nzambi, bwà twètù kulonda njila pàmwè nè banyààbanyà badyombola bàà Mukalenge; bwà twàmòna mwà kwenda nè difwànà dyà Nzambi, mu bwakàne bwônso, nè cijila, mu nsòmbelu wa mpindyewu ewu; tutèeka ku luseke bujitu bwônso bùdi bùtùjìngila bipeepèle nùnkù; batàngile kùdi Mubangi nè Mujikiji wa diitabuujà dyètù, Yesù Kilistò! Amen.

Bìvwa bikumbànyine Abraham, pàakendàye kuntwaku.

¹⁶⁴ Ke Nzambi kumwambila Yè nè: “Mpindyewu, angàtà mwànà mukesè wa balùme ewu. Mpindyewu ukààdi nè bidimu lukàmà nè (biipacila) makùmi àbìdì. Nènku udi nè mwànà wa balùme mukesè mwab’ewu, wa mutù mukèsè wà nsuki yà mvwàngala. Yèyè’s nkaacintu kakesè kalenga. Kàdi ndi muswè bwà ùlwe nendè pa mukùnà apu, nè ùmulàmbùlè bu mulàmbù, ku yèyè nengikalà mwà kupàtula matùngà àbùngì munda mwèbè.” Neciikale munyi’s? Cimweke bu nè Nzambi ùvwa mukònyàngàje byònsò. “Nèngàngacile, ku Izàkà, bwà kubènesha buloba bujima nè ditùnga dyònsò, pàmwè nendè; kàdi ndi muswè bwà wèwè, kuya nendè, kuntwaku nè kumushebeya. Ku dimiinu dyà Izàkà . . .” Àlèluuyàh! “Ku dimiinu dyà Izàkà Mèmè nèmbèneshe ditùngà nè ditùngà dyònsò mwĩnshì mwà Maulu, kàdi ndi muswè bwà wèwè kuya nendè kuntwaku bwà kumushebeya.”

¹⁶⁵ Kaa, taatù mununu, muumìshe mu dīsù, mukolè wa biyooyi awu; nè nkùnyi nè mùfuku mwambula paanyimà, wènda ùlombola mpundà. Ekèlekèlè! Izàkà mwànà awu ùvwa wènda ùya kumpalà kwèndè aku’s! “Yèyè kààkatènkakanakù ku mulayi wa Nzambi, ku bupidyà to.” Bivwa bimùkumbànyine’s!

¹⁶⁶ Bwalu Abraham wàkamba, yèyè mwinè nè: “Ndi mumupetè bu udi mufùmine ku bafwè, nè ndi mutwishiiḽbwe ànu menemene nè Nzambi ùdi nè bukolè bwà kumujuula cyàkàbidi.” Amen! Bivwa bikùmbanyina Abraham, bwà kukùmbajayè bwakàne bwònsò. Yèyè ùvwa mumanyè cìvwàye wàmba aci. Ùvwa mumanyè Nzambi wendè. Ùvwa mumanyè nè, cìvwà Nzambi mwàmbe, Nzambi ùdi nè bukolè bwà kucyènza. Mulayi wònsò wàkenzà Nzambi, Nzambi mmukùmbàne bwà kushààla mukwàte ku mulayi Wèndè, nànsha byà munyi. Nànku, bivwa bikùmbànyine Abraham bwà yèyè kukùmbaja bwakàne bwònsò.

¹⁶⁷ Bivwa bikùmbànyine bayiidi, ku Mpenta, bwà kuyabò ku cibambalu cyà kuulu aci. Bwà cinyi? Bivwa bikùmbana bwà cinyi? Bwalu bààkatwilangana nè Muntu; Mukoonyi wa mabaya, mumanyike nànku kùdi bàà pa buloba, mwena Ngalèlè Mwenyi mwikàle nè dīnà dibì nè: “mulela mu masandi.” Kàdi bàvwa bamòne Muntu awu ùbiiḽsha bafwè. Bàvwa bamòne Muntu awu ùtàbeeja mèsù à mpofo. Bàvwa búmvwè Muntu awu ùyiisha, Dīyi dyà Nzambi didi kadiyi disambakaja. Nè bàvwa bamanyè nè Yèyè ùvwa Maasiyà. Bàkaavwa bamòne bimanyinu byònsò biMunyungùlùkile. Bàkaavwa bumvwè Nzambi wàndamuna mu Maulu. Bàkaavwa bamòne Dikunji dyà Kapyà adi dilembèlèle pamutù Pèndè. Bàvwa bamanyè nè Yèyè nguvwa Maasiyà awu. Nènku pààkabàmbilàYe nè: “Mpitàmbe bwimpè menemene bwà Mèmè kuya; kàdi ndi muswè bwà nūye ku cimenga cyà Yelusàlèlà, nè nùshaalè kuntwaku. Indilaayi ànu kuntwaku.”

“Too nè dibà kaayi?”

“Too nè!”

“Aci neciikalè too nè dībà kaayi, Mukalenge?”

168 “Ànu too nè! Too nè panwàvwàdikiibwà nè Bukolè bwà ku Dyulu! Dìbà adi nenwìkalè bantèmù Bàànyì.”

“Nebishaale too nè ku dìbà kaayì, Mukalenge?”

169 “Too nè ku lukòngò *elu*, nè ku lukòngò *lwàlwa*, nè mu búngì bwònsò bwàbìikilàbo kùdì Mukalenge Nzambi wetù abu. Mu Yelusàlèrà, mu Yudaàrà, mu Sàmaalèrà, nè mu bitùpà byà kule menemene byà buloba. Kàdi, kumpàlà kwà nwènù kuya, ndi muswè bwà nwènù kwindila! Mémè nènwenzèlè cintu kampàndà.”

170 Bìvwa bibàkùmbànyìne bwà kuyabò mu cibambalu cyà kuulu, bwalu bàvwa bamòne Bukolè Bwèndè. Mbamanyè nè Yèyè wàkafwà, mufwè. Wàkafwà lufù lwà menemene mu mùshindù wà nè nànsha ngondo nè mìtootò byàkajaadika nè Yèyè ùvwa mufwè, byàkasokoka mpàlà yàbì nè kabìyì bìswè kukenka to. Buloba bìvwa bumanyè nè Yèyè ùvwa mufwè, mu mùshindù wà nè bwàkazakala nè disaamà dyà mutù. Mabwe àkasàmpuka mu buloba, àvwàmu kacya ànu ku kabùtù kàà mvùlà yà Noà aku. Bàvwa bamanyè nè ùvwa m’Maasiyà. Bàvwa bamanyè nè, Dìyì Dyèndè divwa nè, Yèyè ùvwa nè cyà kwaluja Nyumà Mwímpè. Bàvwa bamanyè nè aci civwa mmulayi. Bàvwa bamanyè nè bìvwa bikèngela bwà kwindilabò kuulu aku bwà Cyôcì aci. Bàvwa baMumòne. Bàvwa bamanyè nè Yèyè ùvwa mufwè; bàvwa bamanyè nè Ùvwa mubiike ku lufù. Bòbò bàkaavwa baMumòne, ki bwà cinyì bàvwa bamanyè civwàbo bàmba aci.

171 Pàdì muntu kàyì mumanyè cidiye wamba to, kèna mwà kwamba byàbúngì menemene to. Kàdi paùdì mumanyè cyùdì munkaci mwà kwamba aci! Wèwè wela meeji nè eci ndisaluka, lwà ùCyàngàtèku musangu wùmwpèlè, dìbà adi nèumanyè cyùdì wamba aci. Kì ndisaluka to. M’Bukolè bwà Nzambi bwà lupàndu. N’Nyumà Mwímpè. Ndi mumanyè cìndì ngàmba aci. Muntu nè muntu, ukààdikù muMupetè, mmumanyè cidiye wamba.

172 Bìvwa bilààle kùdì bayiidi, bìvwa bibàkùmbànyìne bwà nè bìvwa bikèngela bwà kushààlabò bakwàte ku Dìyì Dyèndè, bwà kwindila ku Yelusàlèrà. Kì kubàndabò bwà kwindila ku Mpenta, too nè pààkapetàbo Nyumà Mwímpè. Bwalu, dìbà adi bàvwa bamanyè nè mudimu wàbò wà bwambi kawùvwa mwà kutùngunuka pàvwàbo kabàyi bapetè Nyumà Mwímpè nànsha, bwà kuMufidila bujaadiki. Bàvwa bamanyè nè kabàvwa pabwàsà to. Kàdi byàkakèngela bwà kwikalabò nè Bwikadi Bwèndè, pa nànkù bàakaya bwà kuBwindila.

Bìvwa bikùmbànyìne Peetèlò, paanyimà pàà Yesù mumanè kutwilangana nendè.

173 Mu Maakò 16, mwàmbè nè: “Ndààyi pa buloba bujimà, nùyiishè Èvànjeeliyò. Bimanyinu ebi nebifilè aba bàdì bìitabuujà. Mu Dìnà Dyànyì bòbò nebiipatè baadémons, nebààkulè mu myakulu mipyamipyà, nebàkwatè nyòka nè

byanza; bànwè bintu bìdi bishipangana, kabyàkubenzela bwalu to; bôbô batentèkèlè babèèdi byanza, babèèdi nebàsangalè.”

¹⁷⁴ Bìvwa bikùmbànyìne Peetèlò Munsantu, mulòbi wa kale awu, uvwa kàyì mulonge kàlaasà kakùmbàne bwà kufùnda dìnà dyèndè to awu. Kàdi dīngà ditùkù pàvwàye ùpicila ku ciibi Cilenga cìvwà Solòmò mwibàke aci, kùvwa kulààle muntu uvwa mulèma. Binù byèndè bìvwa bitekète, tupòmbo, kàvwa mwà kwenda to. Ùvwa mùshindù awu. Kàvwa nè dikàndà to. Muntu wa bidimu bitwè ku makùmi ànaayi, kàdi kàyì nè dikàndà to. Kàdi pààkuumvwà Peetèlò dikopo adi dīdila, ke kupwekeshayè mèsù panshì nè kumònayè muntu mucibùkile panshì mulààle mwaba awu, ke Cintu kampàndà kutuutaci mu mwoyi wèndè! Yèyè ùvwa ku Mpenta, ùvwa nè Nyumà Mwìmpè! Yèyè ùvwa nè mulayì wà Yesù, pa nàнку bìvwa bikùmbàne, bìvwa bimukùmbànyìne, bwà kwambayè nè: “Ní ng’argent ní nngòlò mèmè ncyèna naabi to.” Kufilayè bujaadiki bwèndè nè: “Ncyèna nè ní ng’argent ní nè nngòlò to. Kàdi, cīndi naaci aci, nènkupèèshèci bu wèwè mwà kucyàkidila.”

Ndi mwà kudifwànyikijila muntu awu wàmba nè: “Ndi mwà kucyàkidila.”

¹⁷⁵ Yèyè nè: “Dìbà adi, mu Dìnà dyà Yesù Kilistò wa ku Nazàlèetà, juukilà kuulu ùsangalè.” Ke kwololayè cyanza panshì è kumukwàtayè, bwà kwenzeja diitabuuja dyèndè mudimu, nè kumujuulayè mùshindù awu; ke mifùbà yà mu tupòmbo twèndè kupetayì dikàndà, ke kuyayè, wènda ùtùpika, ùsààmuna nè ùtùmbisha Nzambì.

¹⁷⁶ Bìvwa bimukùmbànyìne bwà kucyenza, bìvwa bimukùmbànyìne’s. Bìvwa bikèngela bwà kwikalayè mucyènzè, bwalu ùvwa muyiidi mwela maanyì. Ùvwa nè Yesù. Buloba bujimà bwàkamanya ditùkù divwà didyànjlile adi, mu Tubàdi twà beena Yudà amu nè, pààkamusangishabo kuntwaku, yèyè nè Yone, bùbìdi bwàbò, bapangi nè kabàyi balonge kalaasa; bàvwa bamanyè nè bàvwa nè Yesù, bwalu bàvwa búmvwè mùshindù wùvwàbò bààkula awu, dikima divwàbò naadi adi. Bàvwa bamanyè nè cintu kampàndà cìvwa cibènzèkèlè. Ke Peetèlò kumanyayè aci. Pa nàнку bìvwa bikùmbànyìne Peetèlò, bìvwa bimukùmbànyìne bwalu ùvwa nè mulayì wà Nzambì bwà ditùkù adi.

¹⁷⁷ “Mèmè nènnùpèèshè Bukolè.” Hmm! “Mèmè nènnùpèèshè Bukolè. Nwènú nenwèndelè pa mitù yà nyòka nè tumìnyimìnyì. Cyònsò cinùdì nulòmba mu Dìnà Dyànyì aci, Mèmè nèncyènzè. Wèwè mwambile mukùnà ewu nè: ‘Tentèmùkà,’ nè kùyì wela mpatà munda mwà mwoyi wèbè to, kàdi witabuuja nè ciwàmbi aci necyènzèkè, udi mwà kupeta ciwàmbi aci.”

¹⁷⁸ Mbilààle kùdì Peetèlò dìbà adi bwà kuCìitabuuja, mbimukùmbànyìne, ke cìvwa cikèngela bwà yèyè kwenza, bwalu ùvwa mumanye nè yèyè ùvwa nè mwoyi mu ditùkù dyà

mudimu mumutuma naawù awu. Ke cìvwà Bukênkè bwà dîbà adi ncýôci aci. Dibìikà dyà ku lufù dicìvwà ànu dîlwilakù, Nyumà Mwîmpè ùvwakù. Bìvwà bimukumbànyine.

179 Bìvwà bikumbànyine Pòlò Munsantu, paanyimà pàà mumanè kwikala mudyudi. Nènku mu njila wènda ùpweka ku Damàsèkè dîngà ditùkù, ke Dikunji dyà Kapyà dyàkalombolà Izàlèlèlè kwambwila mu Èjiipitù too nè ku buloba bulaya adi pwà, dyàkavwijiibwa mubidi nè kusòmbela munkaci mwàbò nè kwalukila kùdi Nzambì adi, kwakuladi nendè. Ke kudìkonkayè nè: “*Mmunyi mùdi Eci mwà kwikala Yèhowàh? Bidi mwà kwikala nànkù bìshi’s? Kadi’s ke Yèyè awu mu Dikunji dyà Kapyà dimwèdimwè adi, mulembèlèlè mwaba awu.* Mukalenge, Wèwè udi nganyi ùndi nkèngesha?”

180 Yèyè nè: “Mèmè ndi Yesù.” Kaa, ekèlekèlè! Yèyè kumutùma nè mudimu, kumupèèsha mudimu wèndè wà bwambi. Wàkatùma Pòlò nè mudimu wa dyenza, kumupèèsha wèndè mudimu wà bwambi.

181 Pòlò ùkaavwa mu Bwikadi bwà Nzambì, ùkaavwakù mumòne Dikunji dyà Kapyà. Wàkamòna nè Yesù uvwa musangu kampàndà Dikunji dyà Kapyà awu, pashiishe muvwijiibwe mubidi nè musòmbèlè munkaci mwètù, nè mwalukile ku Dikunji dyà Kapyà, kàdi wàkamutùma nè mudimu ku mudimu wèndè wà bwambi. Àlèluuyàh! Cintu nànsha cìmwè kacyàkumunyùkushakù to. Bìvwà bimukumbànyine, pààkangatàbò mîshwàlà ku mubidi wèndè nè kuyitùmina babèèdi. Bìvwà bimukumbànyine, bwalu yèyè ùvwà mumanyè nè ùvwà mùpostòlò mulaaba maanyi. Wàkamòna bikèèna-kumòna byà Nzambì, nè Nzambì wàkamumwènekela nè kwakula, nè kucimòna cyènzeka ànu menemene. Mòna’s, bivwa bikumbànyine Pòlò, bwà nè pàdiye ùteeta kwambulwisha bantu, kukumbaja Dìyì divwàye mutùmìibwe naadi. Yèyè ùvwà Bukênkè bwà ditùkù adi. Yèyè ùvwà Bukênkè kùdi bàà Bisàmbà byà bendè. Ùvwà mucimanyè. Nzambì wàkamutùma nè mudimu bwà kwikalayè nànkù. Yèyè nguvwa Bukênkè mu ditùkù adi. Pa nànkù, Yèyè wàkatùma Pòlò nè mudimu wa dyenza.

182 Mpindyewu mbitukumbànyine, bitukumbànyine mu ditùkù edi. Tudi bamanyè! Tudi bafùme ku dilonga Bikondo byà Èkèleeziyà. Tudi bamanyè nè tudi bapetè Nyumà Mwîmpè, tudi bamanyè aci kakùyì nànsha mundidìmbì wà mpatà nànsha mukesè to. Tudi bamanyè nè tudi nè Bukênkè bwà Èvànjeeliyò.

183 “Nyingàlalaayi, muntu nè muntu wa kunùdi, nùbatijjiibwè mu Dìnà dyà Yesù Kilistò, bwà dilekelediibwa dyà mpèkaatù yènu, nènku nenùpetè kupà kwà Nyumà Mwîmpè.” Kakwènakù balombodi bàà èkèleeziyà pa buloba apa, anyi cintu cikwàbò nànsha cìmwè, bàdi mwà kwela Aci kadyòmbò to. Ntoo nè penyì pàdi eci nè cyà kwikala cyènjiibwa? “Mulayi wùdi kùdi bàna

kwamba nàнку, kuMubiikilayè nè, “Elohim,” Mùsànjeelà kampàndà, mufwimbila mu mubidi wa buntu, bwà kutwàdila Sodomà nè Gomolà Mukenji kampàndà.

200 Nèнку patùdi tumòna bintu byàkambà Yesù nè nebyènzekè abi, mbitùkùmbànyine bwà twètù kukùmbaja bwakàne bwònsò. Mbitùkùmbànyine bwà twètù kukwàcila Nzambì ku Dīyī Dyèndè. Nudi nwitabuuja nàнку anyi? [Disangisha dīdi dyàmba nè: “Amen.”—Muf.] Nàнку awu itàbaayi bwà biikalè nàнку mpindyewu.

201 “Mwanètù Branham, wèwè’s udi—wèwè’s udi—wèwè’s udi mupàtùke mu bwobùmwè nè bakwàbò, màngumba awu.”

202 Bidi mwà kwikala nàнку. Itàbà bwà biikalè nàнку mpindyewu. Ncyà bushùwà, itàbà bwà biikalè nàнку.

203 “Èè, uvwa mwà kwikalakù bîmpè ndambù bu wèwè mwà kuya kumpàlà nè kwelangana naabò dibòkò’s.”

204 Itàbà bwà biikalè nàнку mpindyewu, aci. Kàdi’s mbitùkùmbànyine nàнку. Twètù tudi bantu Bèndè, bapròfètà Bèndè, beena meeji Bèndè. Mbitùkùmbànyine bwà twètù kukùmbaja bwakàne bwònsò. Pa nàнку, twenzàayi nàнку, patùdi twinyika mitù yètù apa.

Matùngà àdi àpanduluka, Izàlèlèlà ùdi
ùtàbuluka,
Bimanyinu byàkadyànjlà Bible kwamba;
Matùkù à bàà Bisàmbà byà bendè mmabala,
mùle tètè nè bintu bìdi bìkwàcishà bwôwà;
“Alùkilaayi, Éyì nwènù bàdi batàngàlàke, kùdi
bàà kwènù.”

Ditùkù dyà bupikudi dīdi pabwīpì,
Myoyi yà bantu yīdi yàmba kwimana bwà
bwôwà;
Ujībwayi nè Nyumà, myèndù yènù
milongolola nè misukula,
Bàndulukàayi, bupikudi bwènù bùkaadi
pabwīpì!

Bapròfètà bàà mashimi bàdi bàshima, bàdi
bàvila Bulelèlèlà bwà Nzambì,
Bwà nè Yesù Kilistò ùdi Nzambì wetù,
(Mùshindù mwinè wùdibi bilelèlèlè’s wè; kaa,
nkàmà’s!)

Kàdi netwèndeke myaba yàkadyatà bàpostòlò.

Bwalu ditùkù dyà bupikudi dīkaadi pabwīpì,
Myoyi yà bantu yīdi yàmba kwimana bwà
bwôwà;
Ujībwayi nè Nyumà, ikàlaayi nè myèndù yènù
milongolola nè misukula,

Bàndulukaàyi, bupikudi bwènù bùkaadi
pabwipi!

205 Panùcidi nè mitù yènù miinyika apa, mbikukumbànyine, mu dindà emu, bwà wèwè kufila mwoyi wèbè kùdì Kilistò anyi? Yèyè ngudi mwakule neebè anyi? Byôbi nànkù, ela ànu cyanza cyèbè muulu kùdìYe, wamba nè: “Ndi mpindyewu ngiitaba Kilistò. Mbinkumbànyine bwà ndekelela byànyì byònsò, diswa dyànyì, mu dindà emu, kùdìYe. Ndi mpindyewu ngèèla cyanza cyànyì muulu ngàmba nè: ‘Mukalenge Yesù, ikàlàku nè luse.’ Ndi Neebè dijinga, kaa, mùshindù mwinè wùdì Neebè dijinga’s wè! Dìbà dyònsò, ndi Neebè dijinga.” Nzambi àkubènèshè. “Kaa, Musùngidi mubènèshìibwe, ndi mulwè Kùdì.”

Ndi Neebè dijinga, kaa, ndi Neebè dijinga;

Ambàbi tũng bu nè wèwè uvwa mulàale mwaba wùdì mààmù ùsanganyibwa mpindyewu ewu?

Dìbà dyònsò ndi Neebè dijinga!

Kaa, mbènèshèku mpindyewu, Musùngidi
wanyì,

Ndi ndwa Kùdì’s!

[Mwanèètù Branham ùdi wimbila mu matàma—Muf.]

(Éyì Mukalenge, tudi Neebè dijinga;)

Dìbà dyònsò ndi Neebè dijinga!

Kaa, mbènèshèku mpindyewu,

Mukalenge, ndi Neebè dijinga mpindyewu kutàmba mùndì naadì kùkaadi ntàntà mule.

Kàdi ndi ndwa Kùdì’s!

206 [Mwanèètù Branham ùdi wimbila mu matàma, *Ndi Neebè dijinga Dìbà Dyònsò*—Muf.]

207 Taatù wa mu Dyulu, tudi twenda tupweka mu bibandabanda, bamanyè nè Wèwè ngwàkalaya nè: “Ncyàkukushiya, anyi Ncyàkukulekelakù to. Anji kèbaayi dyàmbedi Bukalenge bwà Nzambi, nè bwakàne Bwèndè, bintu bikwàbò byònsò nebànùsakidilèbi.”

Pa nànkù ndi ndwa Kùdì’s!

208 Kwôkò muntu kaaba aka, Mukalenge, udi kàyì mujaalàme mu musùukà wèndè to; bu bôbò mwà kupweka nè kajila aku, kàdi mààmù wanyì mwómù ànu pa dìbà edi mene aku, Éyì Mukalenge, swàkù bwà bìikalè nè bujaadiki abu, bôbò pààbò. Mbitukumbànyine leelù ewu, Mukalenge.

209 Tudi ku ndekeelu kwà njila, Cikondo cyà Èkèleeziyà wa Laòdikiyà; Mukenji kampàndà; dibèngà dyà Mukenji; dishindikà dyà Mukenji; nè Bwikadi bwà Kilistò bùdì bùjaadika nè Yèyè ùdi umwèumwè awu, makèèlèlè mu matùkù à Lotà, nè mu matùkù à mubidi Wèndè, nè mu matùkù à leelù ewu; makèèlèlè, leelù, too nè kashidi.

210 Swâkù bàKwakidilè mpindyewu bu Musùngidi wabò mubènèshùibwe. Enzàku nànkù, Mukalenge. Ndi ndòmba mu Dîná dyà Yesù.

Kaa, mbènèshèku mpindyewu, Musùngidi wanyì,
Ndi ndwa Kùdì's!

Mukalenge wa mushinga mukolè mutàmbe,
Mateeciibwa àjìmiya bukolè bwàwò,
Bulelèlè, Mukalenge, paùdi Wèwè pabwîpi.

Ndi Neebè dijinga, kaa, ndi Neebè dijinga!

211 Pawikalà Wèwè mumwangàte Mukalenge, ikishishà musùkà wèndè wà mushinga mukolè awu mu Dyulu. Enzàku nànkù. Enzàku nànkù, Mukalenge.

Musùngidi wanyì, Ndi ndwa Kùdì's!

212 Taatù Nzambi, tûtèèlèjèku. Mbitùkùmbànyine bwà twètù kukùmbaja bwakàne bwònsò kaaba aka. Tudi bamanyè cidi Dìyì dyàmbe. Katwèna mu mîdimà to. Tudi bamanyè cidi Dìyì dilayè. Tùkwàcishèku, Èyì Mukalenge, bwà twètù kukùmbaja bwakàne bwònsò. Kùmbaja Dìyì Dyèbè. Swâkù bwà mwena kwitabuuja yònsò mwab'ewu ikalè nè diitabuuja mpindyewu, patùdi tulwa kùdi babèèdi apa. Twètù bònsò tudi banangè bwà kwikala nè mwoyi, Mukalenge; kàdi cyà kumpàlà nkupeta Mwoyi wà Cyendèlèlè, bwà buloba bùcilwalwà abu. Tùmwilèku, Taatù, pàdi disangisha munkaci mwà kusambila apa, nangàngà babèèdi nè bàdi mu ntàtu.

213 Ndi ndikonka, ní nganyì ní nganyì, kwòkù beenyi kampàndà munkaci mwètù, bàtù kacya kabàyikù banji kulwa mu tabernacle emu kwònsò eku to, kàdi biikàle nusaama, nè nukeba dikwàcisha dyà Nzambi? Nè mitù yènu miinyika, nwènu bònsò. Nudikù mwà kwela cyanza cyènu muulu, nwènu bàdi beenyi kùndi, bàdi kabàyi bammanyè anyi mèmè ncyiyi munùmanye abu, nènku nudi balwè kùdi Kilistò mpindyewu bwà dikwàcisha. Elà ànu cyanza cyèbè muulu cyanaàna. Nwamònu anyi? Nzambi àkubènèshè, nè wèwè, nè wèwè. Kùdi bààbùngi.

214 Bikèngela ànu wìtabuuje cyanaàna. Mukenji ewu kí ngwà mu cijèngù to, n'Dìyì dyà Nzambi.

215 Ndi mmòna inàbànzà kampàndà. . . Nè mitù yènu miinyika. Mmushààle ànu kacya wàkwàta ku cyanza cyèndè. Ùdi ùsaama disaamà dyà mwoyi. Yèyè's m'Màndàmù Nance. Ngwa ku Madisonville, mu Kentucky. Ncyà bushùwà. Kí mmwòmò anyi, inàbànzà? Udi mwà kujuula mutù pawikalà muswè. Uvwa mwele cyanza cyèbè muulu, kàdi mucilamè ànu muulu. Ncyà bushùwà, kí mmwòmò anyi? Byòbì nànkù, elà cyanza cyèbè muulu. Nudi bamòne mwaba wutùdi nè mwoyi anyi, balundà bàànyì? [Disangisha didi dyàmbe nè: "Èyowà."—Muf.] Ncyèna

mumanyè inābànzà awu to. Ncitu mwānji kumumònakú to. Kàdi ncinyi aci? Ncimanyinu cyà Èvànjeeliyò. Bwà nwāfwānyina . . .

²¹⁶ Udi witabuuja nè mēmè ndi mupròfetà Wendè anyi, inābànzà? Udi witabuuja anyi? Nànsha nānku, tudi beenyi. Mēmè ncyēna mukumanyè to. Dīnà adi divwa dilelèlè, kī mmwômò anyi? Bu nè bìvwa bīmpè, cyōnsò cyākakwambilāYe aci, nyungishà ànu—ànu byanza byèbè kùdi batèèleji, bwà bààfikakù ku dimòna nè aci cìvwa cyà bushùwà. [Disangisha dīdi dicyōnkomoka—Muf.]

²¹⁷ Ncinyi cìvwa mwà kwenza nānku? Yesù wa mu Nazàlèètà. Bwà nwāfwānyinaku kumanya nè mēmè ndi mupròfetà wa Nzambì, nè nnwāmbila Bulelèlè, bwalu mbitukumbānyine. Mukàji kampàndà wākalenga cìvwālù Cyèndè, nè Yēyè kukūdimuka nè kumwambila, bwà “mashi àlwa munda” mwèndè awu, nè kwamba nè mmiimāne.

²¹⁸ Inābànzà udi musòmbe ku luseke lwèbè awu, ùdi pèndè nè disaamà dyà mwoyi. Ncyà bushùwà. Èyowà. Ncyēna mumumanyè to. Udi mumanyè nè mēmè ncyēna mukumanyè to, maamù. Kàdi Nzambì mmumumanyè. Yēyè mmumanyè lutàtù lwèndè, kī mmwômò anyi? Mandamu Allen, udi witabuuja nè Nzambì ùdi mwà kukusàngaja anyi? [Mukàji ùdi wamba nè: “Èyowà.”—Muf.] Pīikala aci ndīnà dyèbè nè lutàtù lwèbè, ela cyanza cyèbè muulu. Ela cyanza muulu, pīikalābi nè ncyà bushùwà. [Disangisha dīdi dicyōnkomoka.]

²¹⁹ Inābànzà udi musòmbe ku luseke kwèbè awu. Ndi muswè kwamba nè Mandamu Bennett. Bōnsò nudi bafūmine mwaba wūmwèwūmwè awu. Ùdi nè disaamà dyà twonyi pamutù pàa disaamà dyà mwoyi. Udi witabuuja nè mwoyi wèbè wōnsò, udi mwà kusàngajībwa, wèwè pèèbè. Udi ucyènza anyi, inābànzà? Elà cyanza cèbè muulu, wāmbè nè: “Nēncītàbè,” dībà adi udi mwà kwalukila kwèbè kumbèlu nè kusàngala. Bu wèwè mwà kwitabuuja! Nudi bōnsò mu Kentucky mwāmwa, wu cimenga cìdi cìbīikidiibwà nè Madisonville.

²²⁰ Musòmbe ànu lwà paanyimà pààpa, inābànzà kampàndà, Mandamu Bone. Ùdi pabwīpi nè Madisonville. Kēna musòmbèle mu Madisonville menemene to, yēyè muntàngile buludi. Kàdi's ke Mwanjèlò awu mwimāne ànu kumutù kwèndè mene aku. Mmusòmbèle ànu pabwīpi nè Madisonville. Dīnà dyèndè dīdi Bone; disaamà dyà mutù wà kapàla, disaamà dyà mfwènke, lukosò. Aci ní ncyà bushùwà, nyungishà cyanza cyèbè utùma paanyimà nè kumpàlā, inābànzà. Itàbùùjā Mukalenge Yesù Kilistò, nè alùkilaaku kwèbè kumbèlu ùsangalè.

²²¹ Lutàtù lwà pa muminu, mukalenge. Udi witabuuja nè Nzambì ùdi mwà kwondopa disaamà dyà pa muminu nè kukusàngaja anyi? Ondòpīibwà! Ikàlā wèwè ànu nè diitabuuja kùdi Nzambì.

222 Màndèmwânzele Hopkins, inábànzà wa bafiike wa mu Chicago awu. Ncyéna mukumanyè to, ncitu mwânji kukumònakù to kacya bândela. Kàdi udi muswè kwondopiibwa ku dîsaamà dyà dinyùnguluka dyà mutù, dyà mutù wà kapàla adi anyi? Ndàaku, itàbùùjà, nènku udi mwà kusàngala, wèwè pèèbè.

223 Màndàmù Hanes wa ku Columbus, mu Ohio. Udi witabuuja Mukalenge Yesù Kilistò, udi mwà kwalukila kwèbè nè kusàngala, wèwè pèèbè.

224 Tudi ku nshiikidilu wa njila. Nudi nwitabuuja anyi? [Disangisha didi dyamba nè: “Amen!”—Muf.] Mbitùkùmbànyine bwà twètù kukùmbaja bwakàne bwònsò. Yèyè wàkalaya nè bintu abi bivwa mwà kwikalakù. S’ki twètù aba. Nudi nuciitabuuja anyi? [“Amen!”]

225 Èè, tentèkèlàngànaayi byanza muntu nè mukwèndè. Ndi muswè kunwelakù lukonko. Yesù wàkalaya nè bintu ebi bivwa mwà kwikala mu matùkù à ndekeelu anyi? Ambàayi nè: “Amen.” [Disangisha didi dyamba nè: “Amen.”—Muf.] “Ànu mwàkadibi mu matùkù à Lotà. Byenzedi bìndi Mèmè ngenza ebi, nenùbyènzè peenu.” Wàkamba kàbìdi eci nè: “Bimanyinu ebi nebìfilè aba bàdì bìitabuuja. Bòbò batentèkéle babèèdì byanza, babèèdì nebàsangalè anyi?” [“Amen.”] Udi mudilongòlòle bwà kwangata kaaba kèèbè, bu mwena kwitabuuja anyi? [“Amen.”] Bwalu mbitùkùmbànyine bwà kukùmbaja bwakàne bwònsò.

226 Mbwakàne bwà Nzambì, bwà nè piikalà mîshwàlà eyi (Ndi ntentekapù byanza byànyì, mu Dìnà dyà Yesù) yinùlenga; Ndi mumanyè nè Nyumà Mwîmpè ùdi kaaba aka, Umwèumwè wàkadi nè Pòlò awu. “Bààkangacila kùdì Pòlò...” Pa nànkù neòndopiibwè, bu wèwè ànu mwà kuciitabuuja.

227 Ndi ngiitabuuja nè Nyumà Mwîmpè umwèumwè awu, Nyumà Mwîmpè wa mu Bible, ùdi kaaba aka mu dîndà emu, ùDijaadika, Mukenji wà matùkù à ndekeelu, Nyumà Mwîmpè munène Yèyè mwìnè awu, ùDìvwija mupersonà, ùbwela mu mubidi wà buntu, wènzà byenzedi Byèndè.

228 Mwva mwimàne mu dîndà emu, mu lutàtù. Nudi bamanyè ànu cîndì pabwîpi nè kumvwa pândì ngùumuka mwab’ewu. Kàdi’s mbitùkùmbànyine bwà bwakàne bwònsò kukùmbajiibwabù.

229 Nzambì mmutèèke Mukenji pa mwoyi wànyì. Mpindyewu mbikukùmbànyine wèwè, bu mwena kwitabuuja, bwà wèwè kwitabuuja. Panùcidi nè byanza byènu bitentekelangana muntu nè mukwèndè apa, kakwàkwikala mubèèdì munkacì mwètù to, bu wèwè ànu mwà kwitabuuja aci nè mwoyi wèbè wònsò, mwikàle mudilongòlòle bwà kwangata kaaba kèèbè.

230 Mpindyewu, Taatù wa mu Dyulu, nyèwù tuKutwàdila batèèleji aba, paanyimà pàa Mukenji ewu. Mukalenge Nzambì, ncyà bushùwà nè bantu bàdì mwà kumòna mpindyewu

nè mbitùkumbànyine. Mbikumbànyine mupròfeta, bwà kwimana pa Diyì. Mbikumbànyine cidimba cyà èkèleeziyà, mbikumbànyine bwà bôbò kushààlabò biimàne kuulu. Mbikumbànyine babèèdi, bwà kwitabuuja Diyì dyà Yesù Kilistò, pàakambàYe nè: “Bimanyinu ebi nebifilè bàdi biitabuuja. Bôbò batentèkéle babèèdi byanza, babèèdi nebàsangalè.”

²³¹ Mwawa muswè kubiikidisha mulongo wà babèèdi awu, Mukalenge. Kàdi mukenji wùdi mufume ku dilwa kùndi, ku téléfònè, mmunyùkùshe, Taatù. Éyì Nzambì, Diyì Dyèbè didi dyàmba nè: “Mbitùkumbànyine bwà kukumbaba bwakane bwonsò.” S’ki bôbò aba, muntu nè muntu.

²³² Nyumà Mwimpè ùdi kaaba aka munkaci mwà kujaadika nè Yèyè ùdi munkaci mwètù. Mpindyewu swàkù bwà Bukolè bwà Nzambì, bwà bujaadiki bwà Nyumà Mwimpè, búbwelè mu myoyi yà bantu aba mpindyewu mene, búbàpèèsha ditwishiiibwa; mwàkadì naadi Danyèlè, mwàkadì naadi Noà, mwàkadì naadi Henòkà amu, mwàkadì naadi Yone amu, mwàkadì naadi Peetèlò, mwàkadì naadi Pòlò, mwàkadì Yesù naadi amu, mwàkadì Abraham naadi amu, mwàkadì bônso abu naadi amu, Mukalenge. Bwà nè, mbitùkumbànyine mu eci cikondo, mùdi bukolè bwà dyondopa dyà kùdi Nzambì bupòngolola, bimanyinu nè maalu à kukèma munkaci mwà kwenjiibwa, ditàbuluja dinène ndilwè munkaci mwà bantu, Nyumà Mwimpè mmumacile munkaci mwà bantu. Mbeelè mbilà, bàakule mu myakulu, bàmbe bipròfeta, mapà manène, nè bimanyinu nè maalu à kukèma. Mwanjèlò wa Mukenji, Mwanjèlò wa cikondo mmutùmwenèkéle mu mmwènekeli wa Nyumà Mwimpè, nè Yèyè ùdi munkaci mwà kutùtwàdila Mukenji. Tudi tuWumòna munkaci mwà kuula. Tudi tuMumòna wàngata mibidi yètù nè ùtùshintulula ùtùumusha ku bantu bàà cifwàkà, ùtùvwija beena mudimu bàà Nzambì, bwà kwakula bimanyinu binène bìdi kabiyi byùmvwika nè maalu à kukèma. Patùdi tumòna bintu ebi, dîbà adi mbitùkumbànyine bwà kukumbaba bwakane bwonsò.

²³³ Patùdi bamanyè nè Abraham wàkatàngila paanyimà kùdi Lotà, nè pàvwà Danyèlè mwà kutàngila kùdi Abraham, nè pàvwà Yone mwà kutàngila kùdi Danyèlè, (Éyì Nzambì!) nè pàvwà Peetèlò nè Yone mwà kutàngila kùdi Yesù. Nènku patùdi mwà kubàtàngila, nè leelù ewu tudì tumòna bipeta bimwèbimwè abi munkaci mwètù, dîbà adi mbitùkumbànyine bwà kukumbaba bwakane bwonsò.

²³⁴ Swàkù bwà Bukolè bwà Yesù Kilistò bùnyùkushèku nzùbu ewu, nè diitabuuja dyà Nzambì, nè bwondopèku muntu yònsò mwab’ewu, ku lutàtù lwònsò nè disaamà dyònsò, Mukalenge. Nènku, bu musadidi Webè, ndi ntùmina démon udi muntwè bibwa mu dindà dijimà emu, udi muteete bwà kumpàtula mu cyambilu awu! Ku ngàsà wa Nzambì, mwawa mushààle mwab’ewu, bwà babèèdi bakwàte nè byà luse aba, anyì—anyì bantu bàà cifwàkà bàà Nzambì bàdi bàkènga aba.

²³⁵ Pàtukà munda mwàbò, Sàtaanà, wêwè démon! Ndi nkutùmina dîyì, ku Yesù Kilistò Nzambi udi nè mwoyi, bwà wêwè kuumuka mu bantu aba, nè kùbàtàcishi kàbìdì to, bwalu mbiimàne bu bânà bàà beena Ebèlù mu dîbà dyà diteeta, bwà kwangata kaaba kààbò, nè kwondopiibwbò kubangila pa dîbà edi mene. Mu Dînà dyà Yesù Kilistò, ndi ntùmina bubèèdì nè démons yà disangisha edi dîyì, yìdì milwè bwà kusaamisha bantu aba, bwà kuumukayì kùdìbo!

²³⁶ Nè mitù yètù miinyika, myoyi yètù kùdì Nzambi, nêngìikalè mwà kwimba musambu kampàndà. Nénngùteetèku, ku dikwàcisha dyènù nè dikwàcisha dyà Nzambi. *Diitabuuja Dyànyì Nditàngile Kùdì*. Ncyèna muswè bwà nwènù kwela mpatà to, nànsha kakesè, kàdì ndi muswè bwà nwènù kwitabuuja mpindyewu. Mbitùkumbànyine. Mbanganyì bàdì beena Kilistò kaaba aka? Elààyi byanza byènù muulu, nwamba nè: “Amen.” [Disangisha didi dyàmba nè: “Amen!”—Muf.] Mbanganyì bàdì beena kwitabuuja? Ambààyi nè: “Amen.” [“Amen!”] Mbanganyì bàdì batentèkèle bakwàbò byanza? Ambààyi nè: “Amen.” [“Amen!”] Dìbà adi mbitùkumbànyine bwà kukumbaja bwakàne bwònsò.

Diitabuuja dyànyì nditàngile Kùdì,
Wèwè Mwàna wa mùkòòkò wà ku Kàlvaryò,
Musùngidi wa kùdì Nzambi;
Mpindyewu ngumvwilèku pàndì nsambila apa,
Umùshàku dipiilà dyànyì dyònsò...
(Mpindyewu, *mpèkaatu* “mbupidyà”)
Kaa enzaku bwà kuumukila ànu ku leelù ewu
Mèmè yònsò ngiikalè Webè!

Pàndì ngendela mu nyòngòlò wa mîdimà wa
njila mibwelàkàne wa pànwàpa apa,
Nè pàdì ntàtù yìpàsàlala yìnniyùngulukila,
(Nzambi wa yààya, ikàlà Mulombodi wanyì
mpindyewu!)
Wèwè ikàlà Mulombodi wanyì;
Tùminàku mîdimà dîyì bwà yàndamukè
mundaamuunyà,
Kùpulà binsònjì byà kanyinganyinga,
Kundekediku mpàmbuka nya kule Neebè
nànsha.

²³⁷ Nè mitù yètù miinyika. Maamù wanyì munanga mununu awu mmumanè kuya kacya ànu pàmvwà munkacì mwà kuyiisha apu, swàkù bwà cyonà cyà dîyì dyànyì cyùmvwikeku mu bipòngòpòngò binène byà mu Dyulu abi.

²³⁸ Pààkangambilàye, ditùkù adi, wàmba nè: “Billy, udi mundiishe. Udi mumfucile nzùbu nè tikè wanyì wa nzembu, mumpèeshe cyàkudyà.” Yèyè nè: “Munanga wanyì, paùvwà mwàna mukese, mvwa mpàtuka mu mashika nè nkòsa nkùnyi,

nkuteemeshela kapyà bwà kukulamina mu luuya. Nè mvwa nkwapikila, citùvwà naaci mu nzùbu, bwà kwipika aci.” Pakumumòna mulààle mwaba awu, nè tuubyanza tukesè tucyòke twàkadì tutùsukwila bilàmbà byètù byà manyaanù atu. Ushààla mwimàne kùyi pabwàsà, nciyì cintu cìndì mwà kwenza nànsha.

²³⁹ Mémè nè: “Maman, mu byanza byà Nzambì udi nè mwoyi, mmùndì ndàmbula musùùkà wèbè mwakàne awu.”

²⁴⁰ Piikalàye mumanè kuya ànu díbà adi; bònsò bwàbò bàkaadi bayè, cyònsò cìdì cinshààdile cìdì ànu bàna bèètù bàà balùme aba. Mukenji ùvwàbo bantwàdìle mu cyambilu emu ùvwà mubì be. Piikalàye mumanè kuya, Nzambì ìkishishèku musùùkà wèndè. Piikalàye ùcìdì ànu neetù, nè mwikàle neetù too nè dilòòlò edi, ku ngàsà wa Nzambì nêngiikalè ku cyambilu eku bwà kukùmbaja mudimu wànyì, bwalu mbinkùmbànyìne bwà mémè kukùmbaja bwakàne bwònsò.

²⁴¹ Bu mûngiikale mwà kujandula, nêngààlujilè Mwanèètù Neville disangisha, mpaasàtà wanyì mukwàcishi mubènèshìibwe ewu. 

61-1001M Mbitùkùmbànyine Bwà Kukùmbaja Bwakàne Bwònsò
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org